

勅脩陝西通志

35

HARVARD COLLEGE LIBRARY  
FROM THE  
HARVARD-YENCHING  
INSTITUTE  
JUL 8 1929

~~Ch L 3154.0.82~~

3

Ch L 3153.7316.82

第三十五卷

兵防二

歷代兵制

軍儲  
塞垣

邊防



陝西通志第三十五卷

兵防二 附考歷代兵制

軍儲

塞垣

邊防

哈佛大學哈佛葉宗圖書館珍藏印

兵制

無考篤公劉其軍三單 詩小雅公劉篇三單相襲也 傳 郃后稷上公之封大

國之制三軍以其餘卒為羨今公劉遷於豳民始從之丁夫適滿

三軍之數單者無羨卒也 箋 毛以為從郃往豳未得安定之時其

為軍也分老弱婦女為三等之陣而單營之鄭言公劉初至於豳

丁夫寡少其軍有三惟單而已無羨卒也正義曰重衣謂之襲三

單相襲者謂三行皆單而相重為軍也此謂發郃在道及初至之

時以未得安居慮有寇鈔故三重為軍使強壯在外所以備禦之

也王肅云三單相襲止居則婦女在內老弱次之強壯在外言有

備也地官小司徒云凡起徒役無過家一人以其餘為羨羨謂家



之副丁也今言三軍則是單而無副故知無羨卒也以周禮言之  
三軍三萬七千五百人然則從公劉之遷其家不滿此數故通取  
羨卒始滿三軍也 疏

**周**以兵定天下既定戢藏干戈教以文德而猶立司馬之官設  
六軍之衆因井田而制軍賦地方一里為井井十為通通十為成  
成方十里成十為終終十為同同方百里同十為封封十為畿畿  
方千里有稅有賦稅以足食賦以足兵故四井為邑四邑為邱邱  
有戎馬一匹牛三頭四邱為甸甸有戎馬四匹兵車一乘牛十二  
頭甲士三人卒七十二人干戈備具天子畿方千里提封百萬井  
定出賦六十四萬井戎馬四萬匹兵軍萬乘故稱萬乘之主戎馬  
車徒干戈素具春振旅以搜夏拔舍以苗秋治兵以獮冬大閱以  
狩皆於農隙以講事焉 漢書刑法志 ○黃帝立邱井之法因以制兵故

井分四道八家處之其形井字開方九焉周之始興太公實繕其

法始於岐都以建井畝 李衛公問對 ○秦襄公當平王初興兵討西戎

以救周平王東遷遂有岐豐之地列為諸侯修其車馬備其兵甲

武事備矣至穆公霸西戎始作三軍又置陷陣三萬及孝公用商

鞅定變法之令令民為什伍行之十年民勇於公戰怯於私鬪又

以秦地曠而人寡晉地狹而人稠誘三晉之人耕秦地優其田宅

而使秦人應敵於外大率百人則五十人為農五十人習戰凡民

年二十三附之疇官給郡縣一月而更謂更卒復給中都一歲謂

正卒復屯邊一歲謂戍卒凡戰獲一首賜爵一級皆以戰功相君

長長平之役年十五以上悉發又非商鞅之舊矣 文獻通考

**秦**二世盡徵材士五萬人為屯衛咸陽令教射下調郡縣轉輸菽粟

芻藁皆令自齎糧食咸陽三百里內不得食其穀 史記二世本紀



漢高祖二年五月蕭何發關中老弱未傅者悉詣軍漢書高帝紀如淳曰

律年二十三傅之疇官高不滿六尺二寸以下為罷癘漢儀注云

民年二十三為正一歲為衛士一歲為材官騎士習射御騎馳戰

陣年五十六衰老乃得免為庶民就田里今老弱未嘗傅者皆發

之未二十三為弱過五十六為老師古曰傅著也言著名籍也高帝

紀○二年六月令諸侯子在關中者皆集櫟陽為衛高帝紀劉攽曰

諸侯子謂諸侯國人高帝紀注○漢興京師有南北軍之屯南軍衛尉

主之掌宮城門內之兵北軍中尉主之掌京城門內之兵文獻通考○

漢制九月都試太守都尉令長丞會都試課殿最十月車駕幸長

安水南門會五營士為八陣進退名曰乘之馬志

文帝三年發中尉漢書百官表材官屬衛將軍軍長安史記文帝本紀

景帝初更名衛尉為中大夫令後元年復為衛尉掌宮門衛屯兵長

樂建章甘泉衛尉皆掌其宮漢書百官表

武帝建元元年詔衛士轉置送迎常二萬人其省萬人文獻通考○三年

置期門羽林屬南軍上始微行八九月中與侍中常侍武騎及待詔

并良家子弟能騎射者期諸殿門故有期門之號以六郡良家子

選給六郡謂上郡西河隴西北地等郡掌執兵送從以材力為官名將多出焉漢書

東方朔傳○元狩三年秋減隴西北地上郡戍卒半發謫吏穿昆明池

武帝紀臣瓚曰西南夷傳有越雋昆明國有滇池方三百里漢欲伐

之故作昆明池象之以習水戰在長安西南周回四十里武帝紀注○

元封六年赦京師亡命令從軍文獻通考○太初元年置羽林掌送從

次期門名曰建章營騎後更名羽林騎又取從軍死事之子孫養

羽林教以五兵少壯令從軍號曰羽林孤兒更名中尉為執金吾掌徼

師兵卒皆屬焉更名郎中令為光祿勳掌宮殿掖門戶屬官有諸



郎掌守門戶出充軍騎凡郎官皆東直執戟宿衛中郎有五官左右車戶騎三

將軍漢書百官表○四年發天下七科謫出朔方張晏曰七科謫史有

罪一亡命二贅壻三賈人四故有市籍五父母有市籍六大父母

有市籍七文獻通考○天漢元年秋發謫戍屯五原冊府元龜○四年發勇

敢士出朔方文獻通考○征和二年初置城門屯兵漢書武帝紀○四年置

司隸校尉持節從中都官徒千二百人捕巫蠱督大姦猾後罷其

兵百官表

昭帝始元二年冬發習戰射士詣朔方漢書昭帝紀○元鳳五年六月發

三輔郡國少年詣北軍天文志

宣帝即位皇太后歸長樂宮置屯衛漢書宣帝紀○令中即將騎都尉監

羽林百官表○羽林有左監主羽林左騎八百人右監主右騎九百

人漢官儀○地節三年冬十月詔曰朕既不德不能附遠是以邊境

屯戍未息今復飭兵重屯久勞百姓非所以綏天下也其罷車騎

將軍右將軍屯兵○元康元年冬置建章衛尉漢書宣帝紀

**後漢**光武以扶風都尉部在雍縣涼州羌數犯三輔將兵衛護園陵

故俗稱雍營漢官儀

明帝永平八年三月初置度遼將軍屯五原鼻栢勝州銀城縣在今十月

詔三公募郡國中都官死罪繫囚減罪一等勿笞詣度遼將軍營

屯朔方五原之邊縣妻子自隨便占著邊縣占著謂附名籍父母同產欲

相代者恣聽之凡徙者賜弓弩衣糧○九年春三月詔郡國死罪

囚減罪與妻子詣五原朔方占著所在○十六年九月丁卯詔令

郡國中都官死罪繫囚減死罪一等勿笞詣軍營屯朔方妻子自

隨父母同產欲求從者恣聽之女子嫁為人妻勿與俱後漢書明帝紀

安帝元初二年詔郡國中都官繫囚減死一等勿笞詣馮翊扶風屯



妻子自隨占著所在

後漢書安帝紀

○冬遣任尚將羽林緹騎五營子弟

屯三輔虞詡說尚罷諸郡兵令各出錢數千二十人共市一馬以

萬騎之衆逐數千之虜大功立矣尚即上言用其計

西羌傳○按此漢兵用騎

始之

順帝永建五年十月詔郡國中都官死罪繫囚皆減死一等詣北地

上郡戍○永和四年九月令扶風漢陽築隴道塢三百所置屯兵

後漢書順帝紀

**晉**

附秦苻堅建元中畧計兵杖精卒有九十七萬建元末下書悉發

諸州公私馬人十丁遣一兵良家子年二十以下武藝驍勇富室

材雄者皆拜羽林郎良家子至者三萬餘騎

晉書苻堅載記

○姚興皇初

元年徙陰密三萬戶於長安分大營戶為四置四軍以領之皇初

中興練兵講武大閱於城西幹勇壯異者召入殿中

晉書姚興載記○按此非

晉制然亦草竊雄圖也故附載其畧云

**周**

大統九年廣募關隴豪右以增軍旅

周書文帝本紀

武帝天和元年秋七月築武功郿斜谷武都留谷津坑諸城以置

軍人

周書武帝本紀

兵制十二衛各分左右皆置將軍以分統諸府之兵有郎將副將

坊主團主以相統治開皇十年罷北方緣邊之地新置軍府

文獻通考

**唐**高祖武德初始制軍府以驃騎車騎兩將軍府領之析關中為十

二道曰萬年道長安道富平道醴泉道同州道華州道岐州道豳

州道西麟州道宜州道

寧州道涇州道在今甘屬

○三年更以萬年道為參旗

軍長安道為鼓旗軍富平道為元戈軍醴泉道為井鉞軍同州道

為羽林軍華州道為騎官軍岐州道為平道軍豳州道為招搖軍

西麟州道為苑游軍宜州道為天節軍軍置將副各一人以督耕



戰以車騎府統之六年廢十二軍改驃騎曰統軍車騎曰別將○  
 所謂天子禁軍者南北衙兵也南衙諸衛兵是也北衙者禁軍也  
 初高祖以義兵起太原已定天下悉罷遣歸其願留宿衛者三萬  
 人高祖以渭北白渠旁民棄腴田分給之號元從禁軍後老不任  
 事以其子弟代謂之父子軍唐書兵志○殿中侍御史九人京畿諸州  
 兵皆隸焉三輔及近畿州都督府皆置府凡六百三十三百官志○  
 關中置府二百六十一積兵士二十六萬舉關中之衆以臨四方

會要

太宗貞觀十年更號統軍為折衝都尉別將為果毅都尉諸府總曰  
 折衝府凡天下十道置府六百三十四皆有名號而關內二百六  
 十有一皆以隸諸衛凡府三等兵千二百人為上千人為中八百  
 人為下府置折衝都尉一人左右果毅都尉各一人長史兵曹別

將各一人校尉六人士以三百人為團團有校尉五十人為隊隊  
 有正十人為火火有長○禁軍及貞觀初太宗擇善射者百人為  
 二番於北門長上曰百騎又置北衙七營選材力驍壯月以一營  
 番上○十二年始置左右屯營於元武門領以諸衛將軍號飛騎

唐書兵志

○京兆府有府百三十一曰真化匡道水衡仲山新城寶泉

善信鳳神安業平香太清餘皆逸華州有府二十曰普樂豐源義全

清義萬福脩仁神水常興義津定城延壽羅文鄭邑宣義相原孝

德溫湯宣化懷德懷仁同州有府二十六曰濟北唐安泰城太州

大亭河東興德連邑伏龍溫湯安遠業善南鄉臨高漢陽襄城崇

道浙谷吉安長春華池永大洪泉善福司禦效誠商州有府二曰

洵水玉京鳳翔有府十三曰岐山雍北道清洛邑留谷岐陽文城

郊邑三交鳳泉望苑邵吉山泉邠州有府十曰嘉陽宜祿公劉良

兵防二



社胡陵蟠川萬敵金池舜城宜山隴州有府四曰大堆龍盤開川  
 臨沂鄜州有府十一曰洛昌龍交鞏川五交大同安光洛安銀方  
 杏林修武安吉坊州有府五曰杏城仁里思臣永平安臺丹州有  
 府五曰宜城通天同化丹陽長松延州有府七曰敦化延川寧戎  
 因城塞門延安金明鹽州有府一曰鹽川夏州有府二曰寧朔順  
 化綏州有府四曰伏洛義合萬古大斌金州有府一曰洪義梁州  
 有府一曰麗水鳳州有府一曰歸昌地理志○貞觀初凡關內團結  
 兵京兆府六千三百二十七人同州六千七百三十六人華州五  
 千二百二十三人選強壯免征賦凡天下節度使有八一曰關內  
 朔方唐六典○關內道華州有鎮國軍商州有興平軍鳳翔有隴右  
 軍更名保義隴州有義寧軍鄜州有肅戎軍鹽州曰保塞勝州曰  
 義勇唐書地理志○太宗置府八百在關中者五百陸宣公奏議○畿內有

八鎮兵隸左右神策軍邠陽鎮近華州良原鎮近邠州編遺錄

宗開元六年始詔折衝府兵六歲一簡自高宗武后時久不用兵  
 府兵之法寢壞番役更代多不以時衛士稍稍亡匿宰相張說乃

請一切募士宿衛唐書兵志○張說為朔方節度使親行五城督士馬

故時邊鎮兵贏六十萬說以時平無所事請罷二十萬歸農時衛

兵貧弱番休者亡命畧盡說請一切募勇強士優其科條簡色役

不旬日得勝兵十三萬分補諸衛以強京師後所謂曠騎者也張說

傳○十一年取京兆蒲同岐華府兵及白丁益以潞州長從兵共

十二萬號長從宿衛歲一番命尚書左丞蕭嵩與州吏共選之明

年更號曰曠騎兵志○十一月詔曰同華兩州精兵所出地資輦轂

不合外支自今已後更不得取同華人充兵防冊府元龜○元宗以萬

騎左右營改為左右龍武軍皆用唐元功臣子弟制若宿衛兵是



時良家子避征戍者亦皆納資隸軍分日更上如羽林○開元十二年詔左右羽林軍飛騎闕取京旁州府士以戶部印印其臂為二籍羽林兵部分掌之○十三年始以曠騎分隸十二衛總十二萬為六番每衛萬人京兆曠騎六萬六千華州六千同州九千岐州六千餘俱屬別域其制皆擇下戶白丁宗丁品子強壯五尺七寸以上不足則兼以戶八等五尺以上皆免征鎮賦役為四籍兵部及州縣衛分掌之又擇材勇者為番頭頗習弩射又有羽林軍飛騎亦習弩諸軍皆近營為塉士有便習者教試之唐書兵志○二十一年朔方節度使統經畧豐安定遠東西受降城安北都護振武等七軍府管兵六萬四千七百人馬四千三百匹舊唐書地理志

肅宗至德二載置左右神武軍補元從扈從官子弟不足則取他色帶品者同四軍亦曰神武天騎制如羽林總曰北衙六軍又擇便

騎射者置衙前射生千人分左右廂總號曰左右英武軍唐書兵志

代宗大曆二年正月詔潼關置鎮兵三千人冊府元龜○四年魚朝恩請

以京兆之好時鳳翔之麟遊普潤皆隸神策軍五年後以興平武

功扶風天興隸之唐書兵志○九年郭子儀上書朔方國北門臣所統

士不當賊四之一河南北江淮大鎮數萬小者數千未始蒐擇請

追赴關中勒步隊示金鼓郭子儀傳

德宗建中四年下詔募兵以白志貞為使請節度都團練觀察使與

世嘗任者家皆出子弟奴馬裝鎧助征授官於是豪富者緣為幸

而貧者苦之○貞元二年改神策左右廂為左右神策軍三年改

殿前左右射生軍為左右神威軍自德宗幸梁還以神策兵有勞

皆號興元元從奉天定難功臣恕死罪兵部乃不能歲比其籍京

兆又不敢綜舉名實三輔人假庇於軍一牒至十數長安奸人多



寓占兩軍身不宿衛以錢代行謂之納課戶吏稍禁之輒先得罪  
 京尹赤令皆為斂屈十年京兆尹楊於陵請置挾名勅五丁許二  
 丁居軍餘差以條限由是少畏○十四年詔左右神策置統軍以  
 崇親衛如六軍時邊兵衣饑多不贍而戍卒屯防藥茗蔬醬之給  
 最厚諸將務為詭辭請遙隸神策軍廩賜遂贏舊三倍由是塞上  
 往往稱神策行營皆內統於中人其軍乃至十五萬唐書兵志  
 憲宗元和初嚴礪為山南西道節度使奏當軍將士請共置一萬二  
 千其數內二千三百八十六人新加從之冊府元龜

文宗太和中王承元為鳳翔節度使奏當軍應管兵三萬人內軍一  
 千五百騎今更添置一千五百騎冊府元龜

昭宗景福二年以藩臣跋扈議以宗室典禁兵乃用嗣覃王允為京  
 西招討使神策諸都指揮使李鐵副之悉發五十四軍屯興平○

乾寧元年詔諸王閱親軍收拾神策亡散得數萬益置安聖捧宸  
 保寧安化軍曰殿後四軍嗣覃王允與嗣延王戒丕將之○韓建  
 畏諸王有兵請皆歸十六宅留殿後兵三十人為控鶴排馬官隸  
 飛龍坊餘悉散之於是四軍二萬餘人皆罷及帝還長安左右神  
 策軍復稍置之以六千人為定已而悉誅宦官神策軍由此廢崔  
 引奏六軍名存兵亡非所以壯京師軍皆置步軍四將騎軍一將  
 步將皆兵二百五十人騎將皆百人總六千六百人番上如故事  
 乃令六軍諸衛副使京兆尹鄭元規立格募兵於市而朱全忠陰  
 以汴人應之唐書兵志

**後周**太祖廣順初陝西弓箭手諸州縣十戶取材勇者一人為之餘  
 九戶資以器甲芻糧宋史兵志

**宋**諸州騎兵步兵禁廂兵建隆以來之制馬軍騎射陝西路求興鳳翔華麟威



一 邊陝西路永興鳳必敵邠馬闥永興突陣乾延廳直華保勝邠歸恩鳳

一 保節陝西路飛騎麟威遠府清邊陝西路無敵保安左衙耀奉化陝西路

一 隨身商水軍興耀武華定遠鳳壯武陝西路鳳翔同耀華乾步捷金勇勝永

一 清遠永興延鄜建武鄜永清丹昭勝坊肅清乾寧邊乾克寧利州

一 元懷遠興保節陝西路永興邠廣塞興順化興英武邠本城利州刺員興

一 諸州並有梅山洞丹刺員丹捉生延驍勇邠武捷鳳翔鳳邠司牧永省作

一 院邠壯城陝西路永興邠其將校則有馬步軍都指揮使有副都

一 指揮使都虞候馬軍有都指揮使副都指揮使都虞候步軍亦如

一 之宋史制兵之額有鄉兵蕃兵鄉兵者選自戶籍或土民應募所

一 在團結訓練以為防守國朝以來陝西有保毅寨戶強人強人弓

一 手義勇麟州有義兵蕃兵者塞下內屬諸部落團結以為藩籬西

一 北羗戎種落不相統一保寨者謂之熟戶餘謂之生戶陝西則秦

鳳邠延河東則麟府其大首領為都軍主百帳以上為軍主其次

為副軍主文獻通考

真宗咸平四年詔陝西沿邊州軍兵士先選中者併升為禁軍名保

捷又令陝西係稅人戶家出一丁號曰保毅使之分番戍守緣邊

充保毅者至六萬八千七百七十五人○五年五月命使臣分往

邠寧渭隴鄜延等州於保安保毅軍內與逐處官吏選取有力者

共二萬人各於本州置營升為禁軍號曰振武指揮○景德二年

鎮戎軍曹瑋言有邊民應募為弓箭手者請給以間田蠲其徭賦

有警可叅正兵為前鋒而官無資糧戎械之費詔人給田二頃出

甲士一人及三頃者出戰馬一匹設堡戍列部伍補軍置巡檢以

統之其後鄜延州軍亦各募置宋史○三年秋七月減鄜延戍兵

真宗本紀○大中祥符九年詔陝西諸州軍揀料本城兵五百人以上



一升為一指揮於本處置營教閱武藝升為禁軍

兵志

仁宗天聖元年冬十月徙陝西緣邊軍馬屯內地

宋史仁宗本紀

○景祐元

年詔聞陝西戍卒多為大將選置麾下及偏裨臨陣鮮得精銳自

一隨自今以全軍隸逐將毋得選占天聖至寶元間增募陝西蕃落

廣銳清邊弩手○康定初趙元昊反西邊用師詔募神捷兵既而

易名萬勝為二十營是時禁兵多戍陝西並邊土兵雖不及等然

驍勇善戰京師所遣戍者不能辛苦摧鋒陷陣非其所長故議者

欲益募土兵為就糧於是增置陝西蕃落保捷定功振武壯勇制

勝延州青澗弩手麟州飛騎府州威遠皆為禁軍詔陝西土兵自

今悉就本路通補詔麟府州募歸業人增補義軍俾耕本戶故地

免其稅租其制與弓箭手畧同而不給田又籍陝西之民三丁選

一以為鄉弓手未幾刺充保捷為指揮一百八十五分戍邊州西

師罷多揀放焉○康定中呂夷簡言自元昊反被邊城砦各為自

守計萬一賊有奔衝即關輔驚擾雖夏竦等屯永興其實兵少自

永興距鄜延諸路皆數百里設有緩急內外不能相救請募勇敢

士三萬訓以武技分置十隊以有謀勇者三人將之分營永興西

寇至則舉鋒相應或乘勢討擊進退不以地分並受夏竦等節制

從之兵志○寶元慶曆間陝西一路弓手盡刺充保捷正軍文獻通考○

陝西護塞慶曆元年募土人熟山川道路曉蕃情善騎射者湟臂

充二百人為指揮自備戎械就鄉閭習武技季一集州教閱無事

放營農月給鹽茗有警召集防守即廩給之無出本路宋史兵志○韓

琦知秦州兼隴州鳳翔等路都總管經畧安撫沿邊招討使以前

日山外之戰諸將多亡歿所從兵眾不可一槩問罪今不立法制

他日各務生全豈復以主將存亡為意若人數不多則軍法可以



必行諸路總管許置親兵百五十人鈐轄百人招討都監等七十人月加給錢二百其出師臨敵主帥陷沒者並斬從之

韓忠獻家傳 ○

二年知青澗城种世衡奏募蕃兵五千涅右手虎口為忠勇字隸

折馬山族言者因請募熟戶給以禁軍廩賜使戍邊悉罷正兵下

其章四路安撫使議范仲淹上言蕃情黠詐不可倚為正兵如去

正兵必至驕蹇不若遇有警旋以金帛募勇猛禦賊為便議遂格

文獻通考 ○皇祐元年詔陝西邊警既息土兵可備守禦東軍屯戍者

徙內郡以省餉饋

宋史兵志

○又簡汰陝西諸路羸兵為民者六萬減廩糧之半者二萬

通鑑

○至和元年陝西募就糧兵騎以四百人步以五百人為一營

○嘉祐五年選陝西本城牢城河清裝禦馬遞鋪卒長五尺三寸勝帶甲者補禁軍其嘗犯盜亡坐黥者配外州

軍歸遠壯勇 ○七年詔陝西土兵番戍者毋出本路

宋史兵志

英宗治平元年十一月科陝西戶三丁之一刺為義勇軍凡十三萬

八千四百六十五人各賜錢二千司馬光累上疏諫之不允

宋史英宗

本紀 ○詔陝西民除商號二州餘悉籍義勇凡主戶三丁選一六丁

選二九丁選三年二十至三十材勇者充止涅手背以五百人為

指揮置指揮使副二人正都頭三人十將虞候承局押官各五人

歲以十月番上閱教一月而罷又詔秦隴邠寧鄜延等州義勇遇

召集防守日給米一升月給醬菜錢三百陝西路治平初總十五

萬六千八百七十三人又陝西州軍悉置壯城以備繕完城壘之

役

兵志

○二年陝西路駐泊兵馬鈐轄梁實等至部蕃召酋領稱詔犒勞賞以銀帛城寨兵馬計族望大小分隊五給旗幟使各繕堡

壘人置器甲以備調發仍約如令下不集押隊首領以軍法從事

秦鳳路寨十三強人四萬一千一百九十四壯馬七千九百九十



一鄜延路軍城堡寨十蕃兵一萬四千五百九十五官馬二千三百八十二強人六千五百四十八壯丁八百十文獻通考○募陝西土

民營伍子弟隸禁軍一營填止八分發兵指揮二十分戍永興軍

邠州仍遣官專掌訓練詔陝西戰卒四十五萬九百并義勇等委

總管司訓練毋得冗占宋史兵志○治平中韓魏公建議於陝西刺義

勇共得二十餘萬人深山窮谷無得脫者人情驚撓而紀律踈畧

終不可用徒費官錢不貲無人敢言其非者司馬君實時為諫官

極言不便魏公竟不為止其後不十年義勇運糧戍邊率以為常

一如君實之言龍川別志○陝西州軍景祐中本城四十三萬八千逮

治平三年乃五十萬治平末陝西州軍並寨戶弓箭手總四萬六

千三百人宋史兵志

神宗熙寧以後之制陝西路騎軍之額自騎射而下有六步軍之額

自左衙而下二十有九並改號曰保寧凡一百一十一指揮總二

萬五百六十三人內司牧永興省作院邠壯城永興鄜耀坊同

沙咸陽橋道永興作院丹騎射永興鳳安邊永興鳳翔同華耀乾必敵邠馬鬪

苑永興突陣乾廳直華保勝邠歸恩鳳翔衙隊隴保節永興邠鄜左衙

耀商隨身耀武華奉化鳳翔勇勝永興清遠永興延開廣同建武鄜昭

勝坊乾肅清寧遠鳳壯武鳳翔同耀邠武捷鳳翔鳳鄜四川

路步軍之額橋道興水軍興懷遠興廣塞興克寧興順化興本

城梁山○宋史兵志○熙寧元年兵部上陝西義勇數陝西路二十六郡

舊籍十五萬三千四百益以環慶延州保毅弓箭手三千八百總

十五萬六千八百為指揮三百二十一文獻通考○二年六月詔陝西

就糧軍士將校其間材効之人孤遠無由自達有司審度其有軍

功驍勇者以名聞當擢置班行以備本路任使宋史兵志○詔併諸軍



營陝西馬步軍營三百二十七併為二百七十馬軍額以三百人  
 步軍以四百人其後總兵之撥併者馬步軍五百四十五營併為  
 三百五十五文獻通考○兵部上陝西十郡并若戶舊籍四萬六千三  
 百今惟秦鳳有若戶○三年秦鳳路經畧使李師中言前年築熟  
 羊等堡募蕃部獻地置弓箭手迄今三年所募非良民初未嘗團  
 結訓練今當置屯列堡為戰守計從之詔募增廂軍陝西減額五  
 千人而所募至三萬人○十月韓絳言今將義勇分為七路內延  
 丹坊為一路邠寧為一路秦隴為一路鳳州鳳翔府為一路乾耀  
 華永興軍為一路逐年將一州之數分為四番緣邊四路十四州  
 每年秋冬合用一番屯戍近裏三路十二州軍即令依此立定番  
 次未得逐年差發遇本處闕少正兵即得勾抽或那徃次邊守戍  
 從之宋史兵志○十一月命陝西立教閱賞罰格玉海○司馬光乞留屯

兵畧曰臣奉勅充永興軍一路兵馬都總管安撫使臣聞本路十  
 州所管屯駐禁軍至少大率皆是緣邊就糧兵士常時分為上下  
 番有一半在逐州或遇邊上稍有警急則盡皆抽去逐州並無守  
 把兵士萬一盜賊乘虛姦人竊發本州官吏手下無兵雖有智勇  
 將安所施臣愚以為逐州宜各添一指揮禁軍屯駐內永興軍為  
 關中根本宜添兩指揮若朝廷別無兵士可以差撥只乞於沿邊  
 就糧兵士內依此數目撥留在逐州屯駐邊上更不得勾抽緩急  
 不至失備溫公集○詔陝西就糧禁軍額十萬人方用兵之初其令  
 陝西河東亟募士補其闕○四年詔比選諸路配軍為陝西疆猛  
 罷陝西路義勇差役又罷陝西諸路提舉義勇官委本屬州縣依  
 舊分番教閱○五年趙高為鄜延路以其地萬五千九百頃募漢  
 蕃弓箭手四千九百人帝嘉其能省募兵之費褒賞之發遣延州



招到漢蕃弓箭手人騎四千九百八十四為八指揮○三月以西邊用兵詔諸處役兵並罷令諸路轉運司剡刷京東西河東北淮南廂軍又令都水監刷河清及客軍共三萬餘人赴陝西團結宋史○六年樞密院言勇敢効用皆以材武應募從軍廩賜既優戰馬戎械之具皆出公上平時又得以家居以勞効賞者凡四補而至借職校弓箭手減十資淹速相遠甚非朝廷第功均賞之意請自今鄜延秦鳳等路各以三百為額第一等步射弓一石一斗馬射弓九斗奉錢千第二等以下遞減一斗奉七百至五百季首閱試於經畧司射親及野戰中者有賞全不中者削其奉次季又不中者罷之戰有功者以八等定賞一給公據二以為隊長三守闕軍將四軍將五殿侍六三班借差七差使八借職其弓箭手有功亦以八等定賞一押官丞局二將虞候十將三副兵馬使軍使四

副指揮使五都虞候六都指揮使七三班差使八借職即以闕排

連者次遷詔可

文獻通考

○十一月詔永興軍同華鄜延丹坊邠耀各

依原刺義勇外商號州保安軍並止團成保甲又以都保置木契

左留司農寺右付其縣凡追胥閱試肄習則出契詔行於永興秦

鳳五路○七年詔分置將副自第一將以下共十七將在河北西

路而鄜延秦鳳又自列將其在鄜延者九在秦鳳者五

宋史兵志

○八

年十一月詔選陝西蕃兵丁壯戶九丁以上取五六取四五取三

三取二二取一并年二十以上涅手背毋過五丁每十人置十將

一五十人置副兵馬使一百人置軍使一副兵馬使一二百人置

軍使一副兵馬使二三百人置副指揮使一軍使二副兵馬使三

四百人加軍使一副兵馬使一五百人又加指揮使一副兵馬使

一過五百人每百人加軍使一副兵馬使一即一族三十人以上



亦置副兵馬使一不及二十人止置十將文獻通考○九年九月詔永

興秦鳳等路義勇以主户三丁以上充不拘户等是年諸路所管

義勇永興軍路八萬七千九百七十八人秦鳳路三萬九千九百

八十人○十年知延州呂惠卿言自熙寧五年招到弓箭手只是

權行差補未曾團定指揮本司見將本路團結將分團成指揮都

分置立將校統轄即於臨時易為勾集從之○元豐二年五月詔

陝西諸路舊制馬軍自十月一日馳射野戰至穀雨日止中書樞

密院請陝西義勇保甲皆如諸軍教閱法從之宋史兵志○四年鄜延

五路有漢蕃弓箭手各附諸將而分隸焉文獻通考○五年正月以新

收復米脂吳堡義合細浮圖塞門五砦地置漢蕃弓箭手及春耕

種其約束補職並用舊條○六年鄜延路經畧司言弓箭手於近

裏縣置田兩處立户及四丁已上乞取一丁為保甲一丁為弓箭

手有二丁至三丁即且令充弓箭手詔保甲願充弓箭手者聽其

見充弓箭手與當丁役毋得退就保甲陝西亦如之○四月河東

經畧司請以麟州飛騎府州威遠子弟二十五以下刺為兵○八

年詔罷秦鳳路置場集教弓箭手令經畧司購求土人習教所宜

立法宋史兵志

哲宗元祐元年詔陝西將兵不出戍他路二月詔永興秦鳳等路提

點刑獄兼提舉保甲并依提刑司例各為一司○二年復置陝西

府界馬步軍○三年兵部言隴山一帶係官地非自朝廷置局招

置標撥無以杜絕姦弊從之後殿前副都指揮使劉昌祚奏根括

隴山地凡一萬九百九十頃招置弓箭手人馬凡五千二百六十

賜勅書獎諭○四年詔將隴山一帶弓箭手人馬別置一將管幹

○七年陝西路諸帥府敢勇以一百人為額專隸經畧司宋史兵志○



紹聖四年五月詔陝西添置蕃落馬軍十指揮哲宗本紀○詔陝西路

添置蕃落指揮各以五百人為額於永興軍鳳翔同華州各置兩

指揮並隸住營州軍將下統制訓練委逐路所屬都總管同選官

招人○元符元年利州路興元府增置就糧武寧永興軍等路創

置蕃落詔罪人應配五百里以上配陝西充廂軍○二年六月鄜

延路新築米脂等八堡若增置土兵馬步軍十一月以呂惠卿奏

減鄜延戍兵五十指揮○三年詔撥陝西保寧指揮入諸路廂軍

額七月詔陝西路新城砦合招弓箭手投換其元祐八年四月不

得招他路弓箭手指揮勿用兵志

徽宗建中靖國元年減放秦鳳路土兵○崇寧元年九月詔董采秦

鳳路安師文鄜延路並提舉弓箭手元符三年罷今復置○五年詔永興秦

鳳路各武臣一員充提舉保甲其見專提舉保甲文臣並罷樞密

院言陝西等處差官詔諭逃亡軍人並許所在首身更不會問便

支口券令歸本營邊上軍人憚於戍守之勞往往逃竄內郡首身

遂得口券歸營恐相習成風有害軍政乞自今應軍人首身並須

會問逃亡赦限依今來詔諭指揮若係赦後逃亡即乞依條施行

從之○大觀元年五月延安置錢監兵○二年六月詔陝西諸路

自罷兵以來數年於此兵未曾撤蓋緣邊將怯懦坐費邊儲戍卒

勞苦可除新邊的確人外餘並直抽歸營有司不得占吝○政和

三年秦鳳路經畧安撫使何常奏諸路並塞民皆是弓箭手關東

戍卒多是硬弩手及標牌手若遇賊於山林險隘之處先以牌子

捍賊次以勁弓強弩與神臂弓射賊先鋒或遇賊於平原廣野之

間則馬上用弩攢射可以一發盡殪牌子與馬上弩皆已試之效

不可不講又步兵之中先擇魁健材力之卒皆用斬馬刀別以一



將統之如唐李嗣業用陌刀法是取勝一奇也詔樞密院劄與諸路經畧司○五年二月詔陝西逐路並復置提舉弓箭手司仍各選差武臣一員充並依提舉保甲條例施行

宋史兵志

欽宗靖康元年正月詔募陝西土人爲兵二月臣僚言陝西恃弓箭手爲國籓籬舊隸帥府比年始置提舉弓箭手官務取數多選練不精法制寢壞乞罷提舉官以弓箭手復隸帥司詔從之五月宣撫司奏陝西游手情民願充軍者亦衆祇緣招刺闕乏例物是致軍額常闕今若給一色銀絹折充例物犒設起發召募人作義勇止於右臂上刺字依禁軍例物支衣糧料錢陝西五路共可得二萬人從之詔遣文武官各一員前去陝西路募兵二萬人赴關是月都水使者陳求道言朝廷差官往陝西招軍適當歲豐恐未易招填若就委監司招募保甲啖以例物與免科差以作其氣可得

勁兵五萬從之七月陝西制置使錢蓋言陳求道請招刺保甲五萬充軍緣比來陝右正兵數少全籍保甲守禦及運糧諸役差使外所餘無幾若更招刺五萬則是正丁占使殆徧不惟難以選擇兼慮民情驚疑欲乞令州縣曉諭保甲取其情願如未有情願之人即乞令保甲司於正丁餘數內選擇通赴關人共成七萬可以足用從之是月錢蓋奏陝西募土人充軍多是市井烏合不堪臨敵今折彥實支陝西六路銅錢各十萬緡每名添錢十千自可精選少壯六路可共得六萬人從之

宋史兵志

高宗建炎中丞相李綱上言今日之計莫若募兵於西北金人搔擾關陝之人流爲盜賊強壯不能還業者甚衆乘此遣使優給例物以召募之新其軍號勒以步伍付之將帥以時教閱訓練不年歲間皆成精兵上以爲然乃於陝西募兵三萬人許召募白身於諸



色廂軍中檢選招收潰散兵卒改刺例物白身人全給餘給半每募及一軍就本路選差材武大小使臣充將官部隊將押赴行在陝西委經制司而以錢蓋復充其任又命永興軍路置帥府要郡次要郡帥府為安撫使帶馬步軍都總管要郡帶兵馬鈐轄次要郡帶兵馬都監皆以武臣為之副改路分為副總管路鈐轄為副鈐轄州鈐轄為副都監總管鈐轄司許以便宜行軍馬事又請於陝西路置制置使使以遠近相應援從之

李忠定公奏議

○紹興元年籍

興元府良家子弟兩丁取一四丁取二每二十人為一隊號曰義

宋史兵志

○四年宣撫吳玠始創興元府良家子招關陝流寓及陣

亡主兵將子弟驍武不能存立者克月給比強弓手五十人為一

隊

文獻通考 ○十年二月命陝西復募蕃漢弓箭手

宋史高宗本紀

○十一年

興元府興州金州三都統兵皆本關西舊部興元都統司兵一萬

七千人金州都統司兵一萬一千人紹興中劉子羽在興元招集

流散立成部伍子羽罷吳玠併將其兵故玠之兵十萬玠死胡世

將為宣撫命吳璘以二萬守興州楊政以二萬守興元郭浩以八

千守金州而玠之中部三萬人分屯仙人關以外璘併將之是以

四川之兵獨偏重於興州

文獻通考

寧宗開禧元年興元都統秦世輔言本司諸軍闕額頗多紹興之末

管二萬九千餘人乾道三年以二萬七千人為額今管二萬五千

四百餘人所差發出戍官占實一萬一百四十三人點閱所部堪

披帶者僅六百二十七人欲乞許本司酌紹興末年元額招刺補

填從之

文獻通考

諸邊將鄜延九將鳳翔十六將

續文獻通考

○凡邊境置兵之州三十

八有鳳翔延安隴商保安綏德葭東勝改置于要州者十一有京



兆金史兵志

海陵天德二年九月置統軍司於陝西路正隆末復陞陝西統軍司為都統府金史兵志

世宗大定二年正月命陝西等路征南步軍並放還家續文獻通考○三

年五月罷陝西統軍司置都統副統五年七月罷陝西都統府復

置統軍司京兆徙陝西元帥府河中金史世宗本紀

章宗泰和間邊鋪軍則陝西居守邊界者金史兵志

宣宗貞祐三年八月諭陝西堅守延安保安綏德鄜坊邠乾耀等處

要害分渭南州郡步兵屯平原令宣撫使治邠州副使治同州之

澄城以統之更以步騎守渭津九月設潼關提控總領軍馬等官

壬午以空名宣勅付陝西宣撫司凡夏人入寇有能臨陣立功者

五品以下並聽選授十月以同華舊屯陝西兵隸陝州宣撫司者

改隸陝西行省十二月陝西行元帥府乞益兵以田琢之眾隸之

金史宣宗本紀○興定二年選募陝西弩手軍二千人為一軍賜號威勇

兵志○三年四月選陝西步騎精銳六千人實京兆戊辰選精銳六

萬分屯邠乾耀等州○元光二年四月設京兆南山安撫司七月

詔籍陝西路僑居官民為軍宣宗本紀

**元**太宗七年七月簽陝西路人匠充軍元史兵志

世祖中統元年五月詔平陽京兆兩路宣撫司簽兵七千人於延安

等處守隘元史世宗本紀○三年十月以鳳翔屯田軍人準充平陽軍數

仍於鳳翔屯田勿遣從軍刁國器所管充簽軍九百一十五人即

日放罷為民陝西行省言士卒戍金州者諸奧魯已嘗服役今重

勞苦詔罷之元史兵志○四年正月以宋忽兒滅里及沙只回回鷹坊

等兵戍商州藍田諸隘五月乙未勅商州民就戍本州毋禁弓矢



○至元元年八月陝西行省臣上言商州險要乞增戍兵鳳翔屯田軍遷戍興元從之

元史世祖本紀

○七年以金州軍八百隸東川統軍

司○十年正月合刺請於渠江之北雲門山及嘉陵西岸虎頭山

立二戍以其圖來土仍乞益兵二萬勅給京兆新簽軍五千人益

之正月陝西京兆延安鳳翔三路諸色人戶約六萬戶內簽軍六

千六月汰陝西貧難軍○十一年正月調襄陽府生券軍六百人

熟券軍四百人由京兆府鎮戍鴨池命金州招討使欽察部領之

五月詔延安府沙井靜州等處種田白達達戶選其可充軍者簽

起出征兵志○五月敕有司閱覈延安新軍貧無力者免之○十二

年簽延安路達魯花赤弟男為軍十六年罷延安路新簽軍○二

十七年十二月遣兵部侍郎靳榮等閱實西安鳳翔延安三道軍

戶元籍四千外復三萬三千二百八十丁樞密院欲以為兵桑哥

不可帝從之

元史世祖本紀

仁宗延祐四年十一月陝西都萬戶府言碣門探馬赤軍一百五十

名鎮守多年乞放還元翼樞密院臣議彼中亦係要地不宜放還

止令於元翼起遣一百五十名三年一更鎮守

元史兵志

泰定帝四年三月陝西行省嘗言奉元建立行省行臺別無軍府惟

有蒙古軍都萬戶府遠在鳳翔置司相離三百五十餘里緩急難

用乞移都萬戶府於奉元置司軍民兩便及後陝西都萬戶府言

自大德三年命移司酌中安置經今三十餘年鳳翔離天都土蕃

甘肅俱各三千里地面酌中不移為便利可

元史兵志

**明**太祖洪武二年延綏守臣建議開設各衛銓官選軍於時有歸附

者有收集者有選充者有編撥者共四等

延綏鎮志

○二十三年耿炳

文奏陝西都司所屬二十四衛馬步軍一十四萬四千九百九十



一人馬八千三百七十二匹世法錄

英宗正統初發遣陝西邊衛官軍操備京師者各還原衛其腹裏衛

分仍舊更番赴京操備○二年募所在軍餘民壯願自効者分隸

操練於陝西得四千二百人人給布二疋月糧四斗世法錄○六年

令陝西土軍優免五丁餘聽科差明會典○天順初清出陝西各衛

遠年無勾之軍同姓名而相推諉者悉發榆林編伍謂之老軍延綏

鎮志

憲宗成化二年延綏守臣盧祥因營堡兵少請選土兵勅御史往會

官點選如延安所屬之州縣選其壯者編成什伍每名量免戶租

六石常存二丁貼其力役五石以下者存三丁三石以下者存四

丁時得丁壯五千餘名○六年三衛老軍撥邊數少巡撫議從老

軍戶內陸續抽選壯丁分四班輪流操備謂之四班壯丁○八年

亂加廝蘭侵套侍郎葉盛總督王越巡撫余子俊奏請清解六年

七年各省軍之不服水土者暫留實邊與清勾雲南兩廣浙閩衛

所軍人俱解榆林以實邊備詔可之謂之雜抽軍延綏鎮志○十年總

制督御史俞子俊題將前項土兵審勘有願入伍當軍者將本戶

稅糧二十石以下者并差役盡行蠲免二十石以上者免二十石

其餘照舊徵納存留本處并附近去處不許遠起邊糧本軍收發

榆林衛入伍食糧差操聽總兵等官調用殺賊明九邊考○十二年余

子俊奏綏德衛十二隊延安衛十九隊每隊五十名有奇凡屯軍

每年俱十月朔到邊備冬次年三月朔踈放農作謂之屯軍一名

備冬軍延綏鎮志○二十年五月以延綏東西三十四城堡指揮等官

權輕令弛復設領班都指揮二員令統陝西潼關等衛所備禦官

軍分上下班歲一番休仍將定南定北乾溝軋澗備禦官軍歸併



原伍半載一更分番戍守世法錄

孝宗弘治中延綏巡撫題召募土兵義勇軍計得一萬三百七十六

名十三年守臣議奏官軍家三丁內選一丁以補軍缺計選二千

名謂之選丁延綏鎮志○十五年太僕少卿題於陝西等處各州官庫

內查取見在官銀每二鎮共贖五萬兩以備召軍之用若係召募

者每名給銀五兩係冊內查出抽選者每名給銀三兩五錢仍免

空閑舍餘一名幫貼就與關支糧賞其見在官員百戶召一百名

與陞副千戶副千戶召一百名陞正千戶正千戶召二百五十名

陞指揮僉事指揮僉事召二百名陞指揮同知指揮同知召二百

名陞指揮使俱月加俸糧一石都指揮僉事召二百五十名陞都

指揮同知都指揮同知召二百五十名陞都指揮使若有為事立

功及革職閑住官員能召百名悉與復職其所召土兵就令原召

之人管領殺賊有功之日照例併功陞職明九邊考○延綏三衛壯丁

輪流操備自弘治以後共得四萬三千五百九十四名延綏鎮志

武宗正德時提督尚書楊一清題西人性氣猛悍尚勇善鬪且見敵

不懼設法召募不拘衛所軍餘舍餘村野土民但係年力精壯騎

射閑熟者籍名在官願領馬者給銀五兩步軍給銀三兩令其置

備軍裝弓矢器具團成隊伍聽總兵守備等官統領訓練不許濫

收不堪之人徒費官錢無益於事明九邊考○正德五年各軍戶內五

丁以下者擇一丁六丁以上者擇二丁計得一千五百二十二名

謂之選丁延綏鎮志

世宗嘉靖二十四年延綏巡撫張子立題綏德衛延安衛屯軍留本

衛設官操練○三十年於免糧土兵餘丁內免五石以下者抽一

丁五石以上者抽二丁十石以上者抽三丁三十一年以免糧十



石上下者抽一丁俱夏秋備邊過冬踈放謂之免糧抽軍

延綏鎮志

穆宗隆慶三年兵馬數目延綏原額馬步官軍八萬一百九十六員

名除節年逃故外實在官軍五萬一千六百一十一員名原額馬

四萬五千九百四十四匹除節年倒失外實在馬二萬七千八百五

十一匹○五年八月兵部覆言常戍之說施於遼東宣大尤便其

延綏見兵四枝當酌行劉應節等議各分兩班每歲在薊者以十

一月中旬放還期至歲暮抵家在延綏亦以十一月中旬起程期

至歲暮抵鎮不必候到交代至於清理主兵宜特遣風力御史往

陝西無論原係何軍凡逃亡者盡數清勾旨如議行

續文獻通考

○陝

西都司領衛二十五守禦千戶所四西安左衛西安前衛西安後

衛延安衛綏德衛漢中衛寧羌衛榆林衛鳳翔守禦千戶所金州

守禦千戶所

餘屬甘省

潼關衛隸中軍都督府而官軍則陝西例得調

用馬志○陝西城操備官軍舍餘五千五十一員名實有馬步二千

五百六十五員名公差商洛等處防守一千四百八十六員名事

故在逃等項一千員名榆林鎮所管三十四城堡常操新募輪班

冬操夏種并事故等項原額馬步騎操官軍共五萬八千六十七

員名常操延綏榆慶等衛馬步官軍四萬一千五十四員名實有

官軍三萬一百二員名事故等項官軍一萬九百五十二員名新

召募甲軍三千名輪班西安南陽潼關寧山潁上等衛所馬步官

軍一萬一千一十三員名實有官軍九千八百八十二員名事故

等項軍人一千一百三十一名見班官軍五千四百七十六員名

冬操夏種無馬官軍二千員名鎮守總兵官在城官軍一萬一千

四百一十三員名協守副總兵部下官軍三千員名

統領延綏遊兵

東路右叅將部

路遊擊將軍二員名部下官軍三千員名



下官軍一千七百八十員名西路左叅將部下官軍一千一百九  
 十三員名中路鎮城所轄十一城堡官軍共七千九百五十六員  
 名東路鎮城所轄外八城堡官軍共四千九百七十二員名西路  
 叅將所轄外十二城堡官軍共七千七百三十八員名明九邊考○榆  
 林鎮屬營六堡二十八榆林鎮馬步官軍三萬三千七十七員名  
 清水營官軍七百一十四員名新安邊營官軍一千四百四員名  
 靖邊營官軍九百七十六員名寧塞營官軍九百八十三員名舊  
 安邊營官軍九百五十四員名定邊營官軍八百四十四員名高  
 家堡官軍九百九十四員名建安堡官軍七百一員名雙山堡官  
 軍八百三十四員名常樂堡官軍七百七十六員名歸德堡官軍  
 三百六十六員名魚河堡官軍六百三十二員名響水堡官軍五  
 百七十三員名木瓜堡官軍四百三十六員名孤山堡官軍六百

五十九員名鎮羌堡官軍六百五十九員名龍州堡官軍五百七  
 十二員名把都堡官軍六百二十二員名新興堡官軍三百八十  
 四員名澇池堡官軍四百二十六員名鹽池堡官軍一百二十五  
 員名波羅堡官軍六百九十二員名懷遠堡官軍四百二十四員  
 名威武堡官軍五百二十五員名清平堡官軍六百二員名神木  
 堡官軍三千七十七員名黃甫堡官軍三百六十九員名永興堡  
 官軍七百六十二員名大柘堡官軍二百九十員名栢林堡官軍  
 五百六十員名鎮靖堡官軍一千八十七員名永濟堡官軍七百  
 三員名三山堡官軍三百二十員名饒陽堡官軍一百八十八員  
 名朱思本輿地圖○明之衛所即唐府兵遺意也自京師達於郡縣之險  
 要者皆立之有事征伐則詔總兵官佩將印領之既旋則上所佩  
 印於朝官軍各回本衛法誠善也洪武初陝西都司所屬凡三十



四衛訓練馬步官軍十六萬七千有奇此大較也自後承平日久  
官皆世胄而不習武是時軍士強壯則占役於權門疲羸則掛名  
於公府支糧則有其數調遣則無其人逃亡者既不勾補占役者  
又不著伍急則藉口召募及調遣而已故老軍變而為土兵土兵  
變而為抽選班軍變而為改折舉祖宗之法而盡變之以至於亡  
而不悟也延緩鎮志

### 軍儲

**殷**

帝謂文王以爾鈎援與爾臨衝以伐崇墉

詩大雅皇矣篇

鈎鈎梯也所以

鈎引上城者臨臨車也衝衝車也

傳

正義曰臨者在上臨下之名

衝者從旁衝突之稱

疏

**漢**

高祖元年夏四月留蕭何收巴蜀租給軍糧食

漢書高帝本紀

○七年蕭

何治未央宮立武庫以藏兵器中尉屬官有武庫令丞少府屬官

有若盧考工室令丞

百官表注云若盧主藏兵器考工主作兵器

武庫精兵所聚

文獻通考

文帝時匈奴數侵盜北邊屯戍者多邊粟不足給食當食者於是募

民能輸及轉粟於邊者拜爵爵得至大庶長

史記平準書

武帝元鼎六年邊兵不足乃發武庫工官兵器以贍之

史記平準書

○武

帝時衛青軍出塞擊匈奴以武剛車自環為營

文獻通考

宣帝五鳳四年大司農中丞耿壽昌奏設常平倉以給北邊

漢書宣帝紀

**後漢**

光武帝造戰車可駕數牛上作樓櫓置於塞上以拒匈奴

後漢書南

匈奴傳

櫓即樓也釋名曰樓無屋為櫓

匈奴傳注

明帝永平五年十一月北匈奴寇五原南單于擊却之是歲發遣邊

人在內郡者賜裝錢人二萬

後漢書明帝紀

安帝元初五年諸羌瓦解三輔益州無復寇倣自羌叛十餘年間軍

旅之費轉運委輸用二百四十餘億

後漢書西羌傳



順帝永建四年尚書僕射虞詡上疏言雍州沃野千里又有龜茲在縣

上郡鹽池以為民利水草豐美土宜產牧牛馬銜尾羣羊塞道北阻

山河乘阨據險因渠以溉水春即水碓也河漕用功省少而軍糧饒足

故孝武光武築朔方開西河置上郡皆為此也書奏帝乃復三郡

遂令安定北地上郡等處常儲穀粟周數年後漢書西羌傳

**晉**附赫連勃勃以叱干阿利造五兵之器精銳尤甚既成呈之工匠

必有死者射甲不入即斬弓人如其入也便斬鎧匠又造百鍊鋼

刀為龍雀大環號曰大夏龍雀銘其背曰古之利器吳楚湛盧大

夏龍雀名冠神都可以懷遠可以柔邇如風靡草威服九區世甚

珍之晉書赫連勃勃載記

**北魏**太武帝始光四年春正月遣就陰山伐木大造攻具太平真君

九年冬北討至於受降城不見蠕蠕因積糧城內留守而還魏書世祖

紀

孝武帝永熙三年夏四月宇文泰徵函涇東秦岐四州粟以給軍周書

文帝紀

文帝大統三年秋八月齊神武度河周太祖令軍人齋三日糧輕騎

渡渭輜重自渭南夾渭而西周書文帝紀

**隋**高祖開皇十五年二月收天下兵器敢有私造者坐之關中緣邊

不在其例隋書高祖紀

**唐**肅宗寶應元年是年四月九日勅駱谷子午等路往來行客所將

隨身器仗等今日已後除郎官御史諸州部統進奉事官任將器

仗隨身自餘私客等皆須過所上具所將器仗色目然後放過如

過所上不具所將器仗色目數者一切於守堤處勒留冊府元龜

德宗興元初李晟為神策行營節度使時李懷光叛德宗再幸梁州



初無芻藁乃令簡較戶部郎中張彧假京兆尹擇官吏以賦渭北畿縣不數日芻糧皆足後為副元帥討朱泚時渭橋先積米鹽十餘萬斛度支方運以備懷光軍晟又密疏以渭近畿雖乘兵亂尚可賦斂寇盜未滅宿兵曠時人廢耕桑又無儲蓄非防微制勝之術也帝深納之至是守禦益固軍不乏食冊府元龜○河湟六鎮既陷歲發防秋兵三萬戍京西資糧百五十餘萬緡唐書食貨志○貞元初吐蕃劫盟召諸道兵十七萬戍邊關中為吐蕃蹂躪者二十年北至河曲人戶無幾諸道戍兵月給粟十七萬斛皆糴於關中宰相陸贄以關中穀賤請和糴可至百餘萬斛帝乃命度支增估糴粟三十三萬斛然不能盡用贄議文獻通考○貞元八年五月初增稅京兆青苗畝三錢以給掌閑驥騎冊府元龜

憲宗元和六年京兆尹王播奏諸縣軍鎮放牧人等不得帶弓箭刀

劍器仗從之文獻通考

文宗太和中王承元為鳳翔節度使奏當軍今更添置一千五百騎請度支給衣糧草料冊府元龜

後唐明宗長興元年十月興元府奏軍府官共進助軍粟三萬三千

石冊府元龜

宋真宗咸平四年陝西保毅軍官給糧賜使之分番戍守宋史兵志○五

年夏四月詔陝西民輓送緣邊芻糧者賜租之半真宗本紀○大中祥符初陝西關兵食州縣括民家所積糧市之謂之推置取上戶版籍酌所輸租而均糴之謂之對糴食貨志

仁宗天聖四年詔作坊造鐵槍一萬五千給秦渭延州等軍○景祐元年三司使程琳上疏論兵在精不在眾陝西軍儲數匱而召募不已且住營一兵之費可給屯駐三兵昔養萬兵者今三萬兵矣



陝西歲費千五百萬其賦入支十之五自餘悉仰給京師自咸平  
 逮今凡沿邊所增馬步軍指揮百六十計騎兵一指揮所給歲約  
 費緡錢四萬三千步兵所給歲約費緡錢三萬三千他給賜不預  
 合新舊兵所費不啻千萬緡天地生財有限而用無紀極此國用  
 所以日屈也今同華沿河州軍積粟至於紅腐而不知用沿邊入  
 中粟價常踴貴而未嘗足誠願陝西募住營兵勿復增置遇闕即  
 遷廂軍精銳者補之仍漸徙營內郡以便糧餉無事時番戍于邊  
 緩急即調發便近嚴戒封疆之臣毋得侵軼生事以覬恩賞違令  
 者重置之法如此則疆場無事而國用有餘矣帝嘉納之宋史○  
 寶元二年三月賜陝西緣邊將士緡錢四月募陝西人入粟實邊  
 十月庚午賜麟府州及川陝軍士緡錢仁宗本紀○陝西糴穀歲預給  
 青苗錢天聖以來罷不復給然發內藏金帛以助糴者前後不可

勝數寶元中出內庫珠直緡錢三十萬付三司售之取其直以助

邊費食貨志○康定元年二月出內藏緡錢八十萬陝西市糴軍儲

又詔江南淮南造紙甲三萬給陝西仁宗本紀○八月詔陝西製柳木

旁牌又詔陝西屯重兵罄本路租稅益以內庫錢帛並西川歲輸

而軍儲猶不足宜度隙地為營田務四路總管轉運悉兼領使○

慶曆二年詔鄜延秦鳳路各置都作院兵志○四年賜鄜延路總管

風羽子弩箭三十萬仁宗本紀○仁宗時龐穎公自延州入為樞密副

使首言關中苦餽請徙沿邊兵就食內地議者爭言不可以為

虜初伏情偽難測未可遽弛備獨公知元昊已困必不能遽敗盟

卒徙二十萬人石林燕語○皇祐元年詔陝西邊警既息土兵可備守

禦東軍屯戍者徙內郡以省餉饋宋史兵志○二年二月出內庫絹下

陝西路以備軍賞仁宗本紀○四年陝西路都總管司言郭諮所造獨



轅衝陣無敵流星弩可以備軍陣之用詔弓弩院如樣製之除諮  
 為鄜延路鈐轄許置弩五百募土兵教之○至和元年詔陝西路  
 每歲夏曝器甲有損斷者悉令完備如復閱視有不堪用者知州  
 通判及主兵官並貶秩兵志○范仲淹上議云延安西有賊界百餘  
 里侵入漢地唐馬燧造戰車行載兵甲止為營陣此路山坡大車  
 難進當用小車二十兩銀絹錢二十萬賞有功將吏又云陝西四  
 路各屯重兵所入中糧草無定數並支京師錢帛久行府庫湏竭  
 又支移關輔二稅往邊上送納道路險阻百姓勞費至轉運司經  
 畫財利應副邊上每年亦無定額縱使元昊納款未能頓解邊兵  
 悠久何以支濟伏望聖慈指揮更選差朝臣四人充陝西四路經  
 畧計置判官專管本路稅賦課利及圖回營田等事仍令三司將  
 逐路軍馬並現在糧草數目約度今後每年各計入中若干石於

京師支給見錢比舊十分中減三分令陝西轉運司約度逐路稅  
 賦課利數目外每年各令支助錢帛若干既糧草錢帛皆是定額  
 自然各務省節不更占冗兵既沿邊入中有數必自那移軍馬入  
 次邊及近裏州軍駐劄此軍國大計乞聖慈留意范文正公集

神宗熙寧元年二月知青澗城劉愬言所隸歸明號箭手八指揮凡

三千四百餘人馬九百匹連歲不登願以丹州儲糧賑恤詔下其

章轉運司行之宋史兵志○八月賜鄜延路轉運司空名誥敕募民入

粟實邊神宗本紀○二年令諸軍餘糧願糶入官者計價支錢復儲其

米於倉明年仍聽行於陝西諸路三年二月詔移巴蜀羨財市布

帛儲於陝西以備邊省食貨志○判延州郭達言陝西起發義勇赴

沿邊戰守今後並令自齎一月糗糧折本戶稅賦若不能自備則

就所發州軍預請一月口食從之知永興軍司馬光極言分義勇



四番於沿邊屯守以為挑敵勞人虛費糧餉於是永興一路獨得免○四年詔付趙高聞鄜延路諸軍數出至鬻衣裝以自給可密體量振恤之樞密院言除不教閱廂軍撥併各帶舊請外今後招到者並乞依本指揮新定請受陝西醬菜錢一百月糧二石春衣絹二匹布半匹錢一千冬衣絹二疋紬半疋錢一千綿十二兩兵志

○六年詔鄜延路經畧司支封椿錢於河東買橐駝三百運沿邊糧草○七年命輔臣議與陝西並塞芻糧之法令轉運司增舊糴三分以所糴虧羨為賞罰仍遣吏按視而陝西和糴或以銀錢紬絹糴於弓箭手食貨志

○八年冬十月陝西帥臣請增給兵器帝令給之○元豐元年冬鄜延路經畧使呂惠卿乞給新樣刀軍器監欲下江浙福建路製造帝不許給以內南庫短刃刀五萬五千口

○四年春陝西轉運使李稷奏本道九軍什物之外一皆無之乞

於永興軍庫以餘財立法營辦兵志○中書言物帛至陝西擇省樣不合者貿易糴糧儲於邊期以一年畢五年戶部上其數凡八百十六萬一千七百八十疋兩三百四十六萬二千緡有奇食貨志

○七月鄜延路計議邊事所奏乞緡錢百萬工匠千人鐵生熟五萬斤牛馬皮萬張造軍器並給之八月詔令沈括以劈陣大斧五千選給西邊諸將十一月陝西轉運使李察言本路都作院五宜各委監司提舉從之○七年陝西轉運副使葉康直言秦鳳路軍器見闕名物計四百三十餘萬使一一為之非十餘年可就乞自京給賜詔量給之兵志

徽宗政和六年軍器少監鄧之綱奏國家訓練士卒各給軍器以備不虞恐歲久因循多致損敝乞自河北陝西路為首令一新戎器

壯國威從之宋史兵志



哲宗元符二年正月出內金帛二百萬備陝西邊儲三年八月出內庫金帛二百萬糴陝西軍儲

宋史哲宗本紀

高宗建炎中命降見錢鈔三百萬貫付陝西路漕司廣糴應副河東

河北兩路又命起川綱河東衣絹於永興軍椿管以待兩路支俵丞相李綱奏上既於陝西路募兵而軍器衲襖旗幟之類經靖康

之變類多散失內庫甲冑甚多重大兵不能勝乞降指揮條具軍器衲襖下諸路轉運司製造內庫甲改為大小三等圖畫式樣製

造旗幟上皆從之

李忠定公奏議

紹興九年八月庚戌賜陝西諸軍冬

衣絹十五萬匹乙丑給新法度牒紫衣師號錢二百萬緡付陝西

市軍儲

宋史高宗本紀

三十二年王之望至梁洋諭豪民使輸財先是

之望以軍興費廣為言朝廷令勸民戶獻納之望因是親至

續文獻通

考

海陵正隆四年命陝西統軍司并虞侯司順德軍官兵並增廩給

金史兵志

世宗大定三年言事者以陝西等路循宋齊舊例州縣司吏弓手於

民間驗物力均敷顧錢名曰免役請以是錢贍軍至是省具數以

聞詔罷弓手錢其司吏錢仍舊

金史兵志

八年八月命左衛將軍大

磐訪求良弓而磐多自取出為隴州防禦使十五年出兵備邊

同州徵箭十萬根以鵬鴈羽為之其價翔躍不可得觀察判官張

穀曰矢去物也何羽不可節度使曰當須省報穀曰州距京師二

千里如民急何萬一有責下官當任其咎一日之間價減數倍尚

書省竟如所請

續文獻通考

章宗承安三年陝西放老千戶謀克蒲輦正軍阿里喜等給賞之例

舊軍千戶十年以上賞銀五十兩絹三十疋不及十年比附十年



以上謀克支謀克十年以上銀四十兩絹二十五疋不及十年銀三十兩絹二十疋蒲輦十年以上銀三十兩絹二十疋不及十年銀二十兩絹一十五疋馬步正軍阿里喜等勾當不拘年分放老正軍銀一十五兩絹一十疋阿里喜旗鼓吹笛本司火頭人等同銀八兩絹五疋三虞候千戶十年以上銀四十兩絹二十五疋不及十年銀三十兩絹二十疋謀克二十年以上銀五十兩絹三十疋十年以上銀三十兩絹二十疋不及十年銀一十兩絹一十五兩蒲輦十年以上銀二十兩絹一十五疋不及十年銀一十兩絹七疋正軍阿里喜勾當不拘年分放老正軍銀一十兩絹七疋阿里喜旗鼓吹笛本司火頭人等同銀五兩絹四疋邊鋪軍請給與射糧軍同陝西路統軍司鎮防甲軍馬軍猛安錢八貫米五石二斗絹八疋六馬芻粟謀克錢六貫米二石八斗絹六疋五馬

芻粟蒲輦錢四貫米一石七斗絹五疋四馬芻粟正軍錢二貫米石五斗絹四疋綿十五兩三馬芻粟阿里喜錢一貫五百文米七斗絹三疋綿十兩步軍猛安馬二疋謀克馬一匹芻粟每馬給芻一束粟五升歲仲春野有青草馬可牧養則止惟每猛安當差馬七十二疋四時皆給又定制陝西歲給六月鎮防軍補買馬錢陝西路正軍三百文阿里喜隨色人二百文金史兵志○泰和五年十一月詔陝西帥臣訓練士卒以備非常仍以銀十五萬兩分給邊帥募民偵伺章宗本紀

哀宗正大三年十二月詔諭陝西省凡戎事三品以下官聽以功過賞罰銀二十五萬兩從其給賞金史哀宗本紀

明宗致和元年九月以也速台兒知行樞密院事將兵詣關西擊河中潼關軍以摺疊弩分給守關軍士元史文宗本紀



明成祖永樂五年令陝西臨邊衛分守城征哨旗軍俱全支米九年  
令陝西都司腹裏各衛所八分米二分鈔明會典

英宗正統三年令陝西西安等衛邊軍有家小者月支糧六斗無家

小四斗五升餘折鈔○五年令陝西都司都指揮管領旗軍及綏

德等寨堡備禦者照甘肅例月支米五斗○八年令陝西西安左

等衛調撥延綏等衛操備旗軍有家小原支本色六斗者添支一

斗無家小原關四斗五升者添支五升又令陝西衛所腹裏旗軍

三箇月全支米一石餘月米鈔兼支令延綏等處操備旗軍有家

小者每名給賞布三疋隻身布二疋綿花俱一斤八兩又令綏德

延安西安等衛鳳翔守禦千戶所正軍校尉有家小者布三疋○

九年又令陝西延綏守邊旗軍有家小者月支米五斗豆二斗餘

三斗折布○十年令陝西西延鳳翔等衛所屯田旗軍分調定邊

等營脩冬者每名給賞布二疋內折鈔一疋綿花一斤八兩又令

陝西延慶二衛并西安左等四衛旗軍原調守邊備冬者每名給

賞布四疋內二疋并綿花一斤八兩給與家小餘布二疋再增綿

花一斤八兩給守邊正軍明會典○十四年令陝西西安延安等衛

府官吏舍人所犯不係賊罪笞杖徒流及軍民人等犯該笞杖不

該立功者定撥各堡納草續文獻通考○正統間失東勝城退守黃河

套中膏腴之地令民屯種以省邊糧明九邊考

代宗景泰元年令陝西延綏總兵鎮守及管糧郎中布按二司等官

于秋草長茂之時量起軍夫起時采取每束重一十五斤設法堆

積委官看守以備支用續文獻通考

英宗天順元年七月諭戶部自遼東抵陝西邊軍良苦其遣給事中

并司屬官各六人齎金分勞之人二金名山藏○二年令陝西布政



司右叅議一員督理糧草

明會典

憲宗成化二年陝西例將在邊各營堡操守官軍餘丁盡數查出于

青草長茂之時督令前去採打有馬者每名採草一百八十束各

勾自已馬匹六個月支用無馬者每名照例採打堪中草一百二

十束運倉上納以備客兵之用

明九邊考

○六年六月命將征盧詔加

延綏征進馬草五十萬束及運太倉見收折草銀五萬兩於軍前

買草應用其馬臨征時許日加料一升屯守則如舊○七年五月

余子俊奏西安左等衛旗軍調撥榆林衛操守防禦已越三年士

無完衣寒苦特甚請運胖襖鞋袴各二萬五千一百餘副分給優

卹詔從其請

世法錄

○令陝西延綏二衛旗軍總旗月支本色八斗

折鈔七斗小旗月支本色六斗折鈔六斗有家小軍人月支本色

六斗折鈔四斗

明會典

○八年何京上禦虜車制遣赴延綏與鎮原

議之車施鉄網網穴發鎗弩行則斂之寬止三尺戰則展之廣至

六尺每五十車為一隊用士三百七十五人

世法錄

○榆林各衛所

官軍月糧例該月初關支守備官軍行糧馬匹草料例該驗日關

支本鎮行糧俱于月初關支遇有征調又起關隨處關支是一官

一軍一月三次關支成化八年總制余子俊奏革行糧每月二次

關支亦節省之意宜各邊通行

明九邊考

○九年令延綏二衛在榆林

備邊者月支本色米六斗折色四斗支銀錢又令延綏各堡馬步

軍餘采草十一月終不完者本堡把總官住俸年終不完者管糧

叅政及監收副使等官住俸○十四年令戶部運銀十萬兩分送

陝西榆林給與官軍准折草料仍行山西河南附近州縣或借撥

或僱運或買辦料豆各萬石穀草各一百五十萬束俱納榆林一

帶倉場

明會典

○二十年十二月發江南折糧銀十五萬并各處鹽



課二百萬引於陝西榆林等處以給邊儲

名山藏

孝宗弘治十三年六月都御史史琳奏榆林等處歲荒民貧恐軍儲不繼有誤機事戶部會議請以近日禮部所借各處鈔關課銀仍還戶部為供邊之數仍開中河東弘治十六年至十八年鹽課一百五十五萬四千引并令浙江等布政司及南直隸所屬凡問過徒流雜犯死罪囚犯俱納銀贖罪其按察司折收罪人紙價及各處扣除在官祇候齋夫及均徭餘剩銀兩俱清查解部轉發給軍上皆從之○十三年復命造御虜車於延綏凡千兩已復下車式於各邊間二載陝西總督秦紘推廣其制車用隻輪前後紘長丈四尺在上發銳者二人在下推車并發銳者四人重可二石而止遇險則四卒肩之以行若遇賊可先發車十兩或五兩直衝其陣前逐則首車向前後襲則末車向後其餘車箱犄角夾攻扼賊歸

路庶幾萬全請名車曰全勝

世法錄

○十五年實徵馬草數陝西布

政司馬草一百五十一萬四千七百一十二束零

明會典

○弘治中

布政文貴奏改西延慶三府東鎮之稅為拋荒折色二萬餘石自

是軍用始窘

明九邊考

武宗正德五年議准延綏鎮墩軍除月糧一石外照夜不收例每日

給米一升○六年議定陝西起運各邊糧草照依時價解銀糴買

上納每州縣各委佐貳官或首領一員管押每府佐貳官一員總

理

明會典

○九年十一月整理陝西糧儲戶部侍郎馮清奏改西安

延綏等府糧草皆徵折色銀兩解邊自是邊用益窘遂有米珠草

桂之謠

陳選明紀

○正德時總制楊一清題查得陝西各鎮自來處置

邊儲不過曰空運曰召商曰糴買弘治十三年間大虜在套動調

京軍差大臣督理軍儲空運腹裏州縣糧草累民賠補至破產鬻



兒今日斷不可行况腹裏空虛亦無糧可吃惟有召商糴買二事可行銀買雖若簡易緣地方道里遠近不同計算脚程多致未踰其本若分派州縣僉報人戶糴買未免累民而官吏里書賣富拘貧侵尅抵換之弊又不能無省費于官歛怨于民亦非至計揆今事勢惟有召商報中似為得策客商射利雖小必趨官府儲糧小費何吝故在客商增一分之價則官司有一分之益但須革弊攬賣窩之弊豈可廢從古飛挽之法

明九邊考

世宗嘉靖十五年總制陝西侍郎劉天和即禦虜車舊制稍為損益上置大小雜兵以一百五十斤為準箱前設蔽象以狻猊傍各施虎盾以禦矢石二車相連可蔽三四十人車用二人更推一人輓之又二人翼之虜入即倚牆布陣隨地形環列而護騎士於中一里之中用車十兩敵遠則施火器稍近則施弓弩又近則以短兵

接之敵走則出騎士以追之夜則用火箭以防之復制隨車小帳令士不露宿以擺列邊牆據扼險要○二十五年五月上深以延綏凋殘為慮允科道鮑道明曹邦輔議詔戶部亟發兵銀六萬往賑令總督親詣撫恤一應軍餉趣陝西巡撫等官亟徵所逋濟之其所成宣大遊兵亦令調還防守

世法錄

○三十四年題准延綏客

兵行糧賊至百騎踰日不退雖在百里之內亦聽支給

明會典

○陝

西布政司歲入榆林鎮夏稅秋糧本色共七萬九千三百四石九斗折色共二十一萬一千九百八十石零各折不等共銀一十八萬四千六百五十八兩二錢三分本色馬草五十五萬六千八百六束河南布政司歲入榆林鎮布豆折銀三萬三千兩榆林本鎮本色屯糧六萬六千一百三十五石一斗八升零屯草七萬三千二百一十一束秋青草三十七萬七千四百六十束年例銀三萬



兩新增募軍年例銀一萬兩額派客兵引鹽銀二萬九千七百五

十兩補歲用不敷引鹽銀三萬三千八十九兩募軍引鹽銀二萬

九千五百二十兩明九邊考○四十五年令各鎮除民屯鹽引外每年

延綏主兵發舊例銀一十九萬五千七十九兩九錢八分新增料

銀二萬二千一百八十五兩二錢三分客兵八萬兩以後視此為

準明會典○延綏年例初不過一十萬兩嘉靖時增至二十一萬兩

延綏主兵銀十九萬兩新增募軍料銀三萬兩客兵銀八萬兩續文

穆宗隆慶三年延綏鎮年例主兵銀二十四萬七千二百六十五兩

二錢一分客兵銀八萬兩○五年薊鎮客兵部覆言在延綏者以

十一月月中旬起程每名給犒賞銀一兩有馬死通支本色行糧以

恤其困題准延綏三年關領硫黃礮硝一次延綏黃三千五百斤

續文獻通考

神宗萬曆二年令延寧二鎮並延慶二府主客兵馬俱屬延綏管糧

郎中兼理凡遇出納召買該道掛號定價郎中收放互相參考○

萬曆初延綏鎮見餉額主兵屯糧料五萬六千四百八十七石三

斗八升草六萬一千五百五束地畝銀一千四十六兩一錢六分

民運糧料九萬七千八百二十六石八斗九升草七千九百四十

二束折色銀一十九萬七千四百三十三兩淮浙鹽一十五萬六

千四百八十二引該銀六萬七千六百二十五兩五錢二分五釐

京運年例銀三十五萬七千二百六十五兩二錢一分客兵淮浙

鹽七萬引該銀二萬九千七百五十兩京運年例銀二萬二百五

十兩○六年實徵馬草數陝西布政司馬平一百三十七萬五千

六百三十四束零明會典○延綏年例銀萬曆中加至三十六萬七



千 明史稿  
軍法志

熹宗天啓三年太倉出數延綏鎮年例銀四十三萬三千七百三十

九兩八錢七分司冊主客兵錢糧分開少四萬七千二百五十一

兩五錢七分世法錄○榆林鎮屬馬二萬四千四百四十六匹糧料

一十八萬九千七百二十八石零民糧三千九百三十三石零草八十

八萬一千二百六十束內榆林鎮馬一萬一千二百三十二匹糧

料三萬三千五百六十八石民糧三千九百三十三石七斗六升草五

千束清水營馬六百七十二匹糧料一千三百五十五石草九萬七

千八百六十束新安邊營馬七百八十二匹糧料一千石草六千

束靖邊營馬五百三十五匹糧料一萬九千二百六十七石草一

萬七千九百四十五束寧塞營馬五百七十七匹糧料二千三百二

十八石四斗草二萬九千九百二十四束舊安邊營馬四百六十

六匹糧料六百石草一萬五千二百束定邊營馬四百四十三匹

糧料五千八百石草三萬八千二百八十二束高家堡馬三百七

十四匹糧料四千一石九斗草三萬二千一百二十三束建安堡

馬四百一匹糧料五千三百七十石四斗草一萬四千八百二十

一束雙山堡馬四百九匹糧料九千七百三十五石草九千九百

四十九束常樂堡馬三百四十三匹糧料四百五十五石草三千六

百八十二束歸德堡馬一百六十七匹糧料三千三百六十二石

六斗草二萬二千七十六束魚河堡馬三百一十二匹糧料一萬

四千六百七十二石一斗草一萬四千六百一十束響水堡馬二

百五十五匹糧料一萬一千四百七十石草八千三百六十束木

瓜堡馬二百六十八匹糧料一千五百二十石草四萬一千二百

五十束孤山堡馬四百四匹糧料四千一百一十石草六萬五千



二百束鎮羌堡馬五百六十七匹糧料五百六十石草八萬六千  
 七百五束龍州堡馬三百七十七匹糧料二千七百七十四石草  
 一千一百二十一束把都堡馬三百二十五匹糧料五千八百石  
 草八千二百九十束新興堡馬八十九匹糧料三千三百八十四  
 石七斗草八千束澇池堡馬一百九十五匹糧料六十二石三斗  
 草九千六束鹽池堡馬一百一十八匹糧料三百五十石草三千  
 束波羅堡馬三百六十四匹糧料六千五百四十八石九斗草三  
 萬三千二百四十三束懷遠堡馬五百二十一匹糧料四千三百  
 五十四石九斗草一萬五千六百四十四束威武堡馬三百五十  
 三匹糧料四千六百一十三石三斗草一萬二千三百六十三束  
 清平堡馬三百四十四匹糧料二千二百五十二石一斗草二千四  
 百十八束神木堡馬一千二百四十八匹糧料二萬四千九百六

十一石三斗草九萬一千三百六十一束黃甫堡馬二百一十四  
 匹糧料五百八十五石草三萬一千一百二十束永興堡馬四百  
 七十八匹糧料四千三百二十石草八萬四千六百四十四束大  
 栢堡馬一百八十一匹糧料四百六十六石草一千二百一束栢  
 林堡馬一百九十五匹糧料三千八百五十二石九斗草三萬六  
 百一十三束鎮靖堡馬五百三匹糧料二千七百石草一萬七千  
 九百四十五束永濟堡馬三百三匹糧料六百七十石六斗草一  
 萬四千一百八十八束三山堡馬二百五十四匹糧料二千二百  
 七十八石七斗草一千一百四十六束饒陽堡馬一百八十八匹  
 糧料六百二十五石草三千八百三十五束

朱思本輿地圖○按六營二十八堡馬匹

總數散數相符惟糧料草束不符今無考

○延綏東起黃甫川西止定邊營邊長地遠為套虜充斥之地考之先朝經畧如余子俊楊一清王瓊輩其所



建置脩築先焉蓋設險衛民實保塞至計也然竊有說此中軍士更番入衛疲于奔命而又以地多沙漠種植為難芻糧不充曾不宿飽萬一虜駐魚河糧道險遠鎮城坐困可不為之經理哉議者欲於府谷至葭州由黃河而上造舟轉運以濟清水木瓜孤山等處亦為甚便近雖題行而建置倉庾改徵本色未聞議及皆今日之所宜汲汲者續文獻通考○霍韜曰延綏軍士月糧一石折銀四錢成化中米一石價銀二錢軍士得銀四錢買米二石食烏得不足也今則銀一錢僅買粟二升軍士數口之家月食八升之粟如之何可足也然粟價所以先廉而後厚者何也成化以前邊防嚴固猛將林列故邊地盡耕邊粟自多今則將庸卒弱不堪支持地之出粟者寡人之食粟者衆成化以前鹽引皆輸邊粟故富商自招流民自墾邊地其米價自平而食自足弘治以後鹽引輸銀故富

商大賈得輸銀之便而不復開墾邊地粟之所以貴而食之所以

不足者殆為此也圖書編○九邊舊無客兵止有主兵歲輸民運屯

鹽足以自給未嘗有兵餉也即余子俊初開榆林衛時增置城砦

以民運不繼奏請江南折糧銀以備緩急不過一時之權計也自

後軍政不脩屯鹽漸廢請發帑金歲以為常嘉靖末延綏一鎮軍

餉年例費以二十七萬計况萬曆以後哉夫以九邊數十萬之衆

不耕而仰食於民國家之力幾何而不困也延綏鎮志

塞垣

**周**魏惠王十九年築長城塞稠陽史記魏世家正義曰括地志云稠陽縣

漢舊縣也在銀州銀城縣界按魏築長城自鄭濱洛北達銀州至

勝州稠陽縣為塞也稠陽有連山東至黃河西南至夏會等州稠

音固魏世家注○秦昭王時北地上郡築長城以拒胡史記匈奴傳



**秦** 始皇帝三十三年西北斥逐匈奴自榆中並河以東屬之陰山廣

曰在五原北以為三十四縣城河上為塞又使蒙恬渡河取高闕山名在五原

北陶山北假中地名近五原築亭障以逐戎人徙謫實之初縣史記秦本紀

○秦已併天下乃使蒙恬將三十萬眾北伐戎狄收河南築長

城因地形用險制塞延袤萬餘里於是渡河據陽山逶迤而北暴

師於外十餘年居上郡威振匈奴史記蒙恬傳河南正義曰靈勝等州

陽山徐廣曰五原西安陽縣北有陰山陰山在河南陽山在河北

注傳

**漢** 高祖二年繕治河上塞史記高祖本紀

武帝元朔二年取匈奴河南地築朔方復繕故秦時蒙恬所為塞因

河為固冊府元龜○元封六年漢使因杆將軍數築受降城○太初三

年漢使光祿徐自為出五原塞數百里遠者千餘里築城鄣列亭

至廬胸而使游擊將軍韓說長平侯衛伉屯其旁使彊弩都尉路

博德築居延澤上史記匈奴傳正義曰五原郡榆林塞在勝州榆林縣

四十里顧引云鄣山中小城亭侯望所居也括地志云五原郡相

陽縣北出石門鄣得光祿城又西北得支就縣又西北得頭曼城

又西北得牢城河又西北得宥虜城按即築城鄣列亭至廬胸也

括地志漢居延縣故城在張掖縣東北千五百三十里有漢遮虜

鄣博德所築匈奴傳注

**後漢** 世祖建武十二年冬遣驃騎大將軍杜茂將眾部弛刑屯北邊

築亭侯亭侯伺侯望敵之所修烽燧後漢書光武帝紀邊方備警作高土臺臺上作

桔臯桔臯頭有堯零以薪草置其中常低之有寇即燃火舉之以

相告曰烽又多積薪寇至即燔之望其烟曰燧晝則燔燧夜乃舉

烽廣雅曰堯零籠也漢書音義○十四年馬成代杜茂繕治障塞自西



河至渭橋築堡壁起烽燧十里一侯後漢書馬成傳

安帝元初三年秋築馮翊北界侯塢五百所後漢書西羌傳

順帝永建元年因朔方以西障塞多不修南部單于憂恐上言求復

障塞順帝從之增置緣邊諸郡兵列屯塞下教習戰射後漢書南匈奴傳

○五年於扶風漢陽隴道作塢壁三百所置屯兵以保聚百姓西羌傳

**北魏**太宗泰常八年二月戊辰築長城於長川之南起自赤城西至

五原延袤二千餘里備置戍衛北魏書太宗紀

高祖太和中高閭上表曰王公設險以守其國今宜依故於六鎮之

北築長城以禦北虜雖有暫勞之勤乃有永逸之益六鎮東西不

過千里若一夫一月之功當三步之地三百人三里三千人三十

里三萬人三百里計十萬人一月必就其利有五罷遊防之苦一

也北部放牧無抄掠之患二也登城觀敵以逸待勞三也省境防

之虞息無時之備四也歲常遊運永得不墮五也詔曰覽表具卿

安邊之策比當與卿面論北魏書高閭列傳

**隋**高祖開皇元年四月發稽胡脩築長城二旬而罷隋書高祖紀 ○遣司

農少卿崔仲方發丁三萬于朔方靈武築長城東至黃河西距綏

州南出勃嶺綿亘七百里明年帝復令仲方發丁十五萬于朔方

已東緣邊險要築數十城以遏虜寇冊府元龜 ○六年二月發丁男十

一萬脩築長城二旬而罷 ○七年二月發丁男十萬餘脩築長城

二旬而罷隋書高祖紀

煬帝大業三年秋七月發丁男百餘萬築長城西距榆林東至紫河

一旬而罷 ○四年七月發丁男二十餘萬築長城自榆林谷而東

九月詔免長城役者一年租賦隋書煬帝紀 ○長孫晟奏染干部落歸



者既衆雖在長城內猶被雍閭抄畧請徙五原以河爲固於夏勝  
兩州間東西至河南北四百里掘爲橫塹令處其內任情放牧免  
于抄掠上從之延綏鎮志

**高祖武德中**劉弘基爲井越將軍領步騎一萬自豳州北界東距  
子午嶺西接臨涇脩營鄣塞副淮安王神通備虜寇于北鄙州府志  
中宗景龍二年張仁愿爲朔方軍總管先是朔方軍與突厥以河爲  
界河北岸有拂雲神祠突厥將入寇必先詣祠祭酌求福因牧馬  
料兵而後渡河時突厥默啜盡衆而擊突騎施娑葛仁愿請乘其  
虛奪取漠南之地於河北築三受降城首尾相應以絕其南寇之  
路太子少師唐休璟以爲兩漢以來皆守黃河今於寇境築城恐  
勞人費功終爲賊有建議以爲不便仁愿上請不已中宗竟從之  
仁愿表留年滿鎮兵以助其功時咸陽兵二百餘人逃歸仁愿盡

擒之悉斬於城下軍中股慄役者盡力六旬而三城俱就以拂雲  
祠爲中城與東西兩城相去各四百餘里皆據津要遙相應接北  
拓三百餘里於牛頭朝那山北置烽堠一千八百所自是突厥不  
得度山放牧朔方無復寇掠減鎮兵數萬人仁愿初建三城不置  
壅門及卻敵戰格之具或問曰此邊城禦賊之所不爲守備何也  
仁愿曰兵法貴在攻取不宜退守寇若至此即當併力出戰廻顧  
望城猶須斬之何用守備生其退恧之心也其後常元楷爲朔方  
軍總管始築壅門以備寇論者以此重仁愿而輕元楷焉冊府元龜  
三受降城中城南直朔方西城南直靈武東城南直榆林明九邊考  
代宗大曆中馬燧爲隴州刺史州西有通道二百餘步上連峻山與  
吐蕃相直虜每入寇皆出於此燧乃按行險易立石種樹以塞之  
下置二門上設樵櫓八日而功畢張獻甫爲邠寧節度使選險要



之地以為烽堡又上疏請復鹽州等鎮各置兵防以備蕃寇朝廷皆從之冊府元龜

穆宗長慶四年李祐為夏州節度使奏於蘆子關北木瓜嶺勅築堡柵以捍党項之衝其壁壘屋並出當軍財力不別請錢祐於塞外

凡築五城烏延宥州臨塞陰河淘子而宥州烏延皆方廣數里尤居要害蕃戎畏之冊府元龜

敬宗寶曆元年振武節度使張惟清以東城濱河徙置綏遠烽南唐書

**明**成祖永樂十二年七月勅陝西臨邊諸城增烽埃謹備禦名山藏英宗正統間寧夏副總兵黃鑑奏偏頭關東勝州黃河西岸地名一

顯樹起至榆溝速迷都六鎮沙河海子山火石腦兒鱓石海子回回墓紅鹽池百眼井甜水井黃沙溝至寧夏黑山等處共立十二

城堡七十三墩臺東西七百餘里時議以地土平漫難據已之○總兵石亨奏延綏一路營堡移從直道以府谷堡移柴關故城孤

山東村二堡移野蘆州神木堡移永城栢林高家二堡移石落澗雙山堡移真溪灘榆林城移輝林白澗灘響水波羅移白土窰

土門堡移白臘峯大兔鶻堡移濫柴關龍州城移北城塞門堡移古窰靖邊營移蒯河寧塞營移察罕腦兒直與安邊定邊相對時

守土者以徙置煩勞已之世法錄○正統二年守將都督王楨始請榆林城堡往北三十里之外沙漠平地則築瞭望墩臺虜窺境即

舉烟示警往南三十里之外則埋軍民種田界石多于硬土山溝立焉界石外開創榆林一帶營堡累增至二十四所歲調延安綏

德慶陽三衛官軍分戍而河南陝西客兵助之列營積糧以遏寇路續文獻通考

○七年六月用總兵巡撫議依界石一帶山勢隨其曲



折剷削如城高二丈五尺川口左右俱築大墩調軍防守

世法錄

憲宗成化初延綏指揮同知房能請移營堡以固邊方臣所守迤東地原設塞門堡白洛城二處俱在偏南以裏去邊墩相遠道路迂曲聲勢不聞看得白洛城北地名鞞營塞門堡北地名榆林依據險阻水草便利又與大兔鶻龍州邊堡接徑易為應援可將安定守官軍一百員名併入白洛城數內操守為宜○二年延綏紀功兵部郎中楊琚奏自偏頭關邊墩河西一顆樹至寧夏黑山東西七百餘里立十三城堡又以府谷至寧塞十六堡移置故城至察罕腦兒一路併作二十堡其延綏西路安邊定邊二營與寧夏河東四堡仍用不移上命兵部會議以聞○十一月整飭邊備兵部尚書王復奏臨邊府谷等一十九堡俱極邊要地必須增置那移庶為易守將府谷堡移出芑州舊城東村堡移出高漢嶺響水堡

移出黑河山土門堡移出十頃坪大兔鶻堡移出響鈴塔白洛城堡移出鞞營兒塞門堡移出務柳庄東西對直捷徑水草亦甚便利內高家堡至雙山堡雙山堡至榆林城寧塞營至安邊營安邊營至定邊營相去隔遠合於各交界地名崖寺子三眼泉柳樹澗瓦剗梁各添哨堡一座就於隣近營堡量摘官軍哨守又於安邊營起每二十里築墩臺一座通共二十四座定邊營起每二十里築墩臺一座共十座俱於附近軍民量撥守瞭北面沿邊一帶墩臺空遠者各添墩臺一座共二十四座隨其形勢以為溝墻必須高深足以遮賊來路因其舊堡廣其規制必須寬大足以積糧草容人馬從之○八年侍郎葉盛等言延綏西路舊守土門太兔鶻等堡並未守鐵鞭鎮地名五穀黑城子銀州關等城俱宋時防守夏人所築山勢最險水泉甚便近年棄土門等處乃守懷遠威武



等堡既無險可據又取水太遠宜將鐵鞭等城漸為修補為官軍  
截殺駐劄之所不果行世法錄○巡撫延綏都御史余子俊疏奏延  
邊西路定邊二營俱係平漫沙漠難立牆塹近年於定邊東空添  
築永濟小堡按伏馬匹鎮靖堡軍馬原守塞門今移於畢家堡五  
營堡水苦且遠人馬多病內定邊新興安邊永濟四營堡賊易窺  
見虛實軍馬難於出入但鎮靖堡已行奏乞仍守塞門其餘四營  
堡俱各那移就險而守定邊營接連寧夏花馬池我固便利彼無  
隣援不可動也惟將新興堡移於迤南古跡海螺城安邊營移於  
迤南邊營中山坡永濟堡移於迤南上紅寺鎮靖堡不必那回塞  
門却移於迤北白塔澗口海螺城中山坡上紅寺多是削山為城  
俱有門禁即可搬移逐漸修理其白塔澗口就快灘河迤南之險  
其河深二三丈遠百餘里事成之後則定邊新興安邊永濟寧塞

靖邊鎮靖龍州八營堡之地以守則固以戰則利况常年必須民  
間運納穀草今只令納戶就被採野草自足供給此保民之計也

明奏疏

○十年閏六月余子俊奏脩築邊牆之數東自清水營紫城

砦西至寧夏花馬池營界牌止凡修城堡一十二座榆林城南一

截舊有北一截創修安邊營及建安常樂把都河永濟安邊新興

石澇池三山馬跏泉八堡俱創置響水鎮靖二堡俱移置凡修邊

牆東西長一千七百七十里一百二十三步守護壕牆崖砦八百

一十九座守護壕牆小墩七十八座邊墩一十五座奏入上令所

司知之○七月命榜諭延綏等處所司嚴飭邊備每年四月八月

令守備官軍修葺垣牆墩堡增築草場界至時加巡察敢有越出

塞垣耕種及移徙草場界至者俱治以法○十六年子俊為兵部

尚書言延綏三路東路神木西路安邊皆山勢險峻虜難輕入惟



中路榆林東有常樂雙山建安高家四堡西有響水波羅懷遠威武清平五堡南有歸德魚河二堡皆地勢平曠可以通騎主將一人難於應敵宜增設守禦世法錄

世宗嘉靖十年閏六月王瓊奏計度榆林東中二路大邊六百五十六里當修者三百十里二邊六百五十七里當修者二百四十八里因言二邊乃成化中余子俊所修因山為險屯田多在其外大邊弘治中文貴所修防護屯田中間率多平地築牆高厚不過一丈可壞而入今當先修大邊必使岸塹深險牆垣高厚計用了卒萬八千人乞發帑金十萬從之世法錄 ○二十二年題准延綏逼鄰套虜添定邊寧塞二堡修築邊牆明會典 ○二十四年總督曾銑言自定邊營至黃甫川連年虜入率由是道當亟為脩繕分地定工次第脩舉西自定邊營東至龍城堡計長四百四十餘里為西段

所當先築自龍城堡東至雙山堡計長四百九十餘里為中段自雙山堡東至黃甫川計長五百九十餘里為東段歲脩一段期以三年竣事明紀事本末 ○四十三年令榆林西北古梁易馬二城增脩城堡又令鎮城硬地梁一帶小邊柳河梁各處添設城堡以嚴防

護明會典

穆宗隆慶元年題准延慶地方東有黃草塢小滴溜石人坪西有蘆關嶺龍安集靖邊龍尾背化字倉寧塞吳旗營俱係要路通行及時脩築又題准榆林鎮邊牆自石峽墩迤東至常樂地界及鎮城東西北三面外邏城俱分投脩築 ○三年題准脩築延綏鎮東起黃甫川邊牆迤西至常樂堡通以五年為限明會典 神宗萬曆二年題准延綏墩臺一墩止軍十名不能固守邊內險阻可建墩院者仍行增築又于十里之間酌量緩急以為寨城又題



准脩建延綏一鎮三段邊牆六百七十一里墩臺七十五座墩院  
 八座寨城七座石砌大川河口一處土築大川河口四處石砌河  
 口水洞連臺一座石券關門一座石砌并土築溝口一十七處磚  
 石券砌大小水洞閘門八十三處水口四十五處水眼五十一處  
 水道四百二十五處○三年題准延綏榆林神木定邊靖邊四道  
 築空心敵臺見存城垣六十二座民寨堡城一百四十九座寨城  
 五十五座空心敵臺二百三十九座敵臺一百一十六座墩臺一  
 千三百一十六座明會典中路榆林城在常樂保寧之中左山右水  
 設巖疆保寧波羅相去八十里中有響水一堡去邊七十里舊  
 恃無定河為限今水淺不足憑宜於保寧波羅之間添置一堡移  
 響水之兵守之懷遠威武清平邊垣臨險高峻可據然衝口實多  
 川面平行如西川小理河以灞最為首衝當備且自常樂抵波羅

沿邊積沙高與城等剷去復滿又保寧昔多水澤今渚漸涸馬無

所飲歸德之餉道可虞况保寧常樂實扼魚河歸德大川之衝尤

當首為綢繆者

延綏志中路議

○東路黃甫川堡與晉之岢嵐樓子營隔

河相對西至斐山十二城崗阜交錯深塹高崖蜿蜒四五百里東

南逼臨大河最稱險要自昔虜難深入然雙山之大川南近米脂

為最衝黃甫川之河水冬則易度且密邇葭州府谷神木吳堡諸

邑軍民雜居保牧為難所宜隨時設備因事制宜者也

延綏志東路議

○

延鎮定邊營西隣寧夏與花馬池接壤轉而東為剗井龍城十五

營堡皆倚山臨塹然寧塞柳樹澗平川錯雜為延安門戶較之鎮

靖靖邊尤為要害柳樹澗迤西則曠野平原無險可恃新安邊新

興石澇池三山諸堡設在腹裏議者欲分丁貼守亦一策也輒并

去定邊五十餘里宜於瓦剎梁增設一堡如鎮羅堡故事以便接



應定邊西郭之外南北二沙最為邊患除之復聚不如增築墩臺之為要也延綏志西路議○榆林東起黃甫川西至定邊營長垣九百二

十餘里城堡三十四墩臺一百七十有零座墩堡勾連橫截河套之口內復塹山湮谷另為一邊名曰夾道地利亦險矣九邊考

邊防

**高祖二年**與關內卒乘塞史記高祖本紀李奇曰乘守也本紀注

文帝十四年冬匈奴謀入邊為寇攻朝那塞乃遣三將軍軍隴西北

地上郡中尉周舍為衛將軍郎中令張武為車騎將軍軍渭北車

千乘騎卒十萬○後六年匈奴入上郡以將軍張武屯北地河內

守周亞夫為將軍居細柳徐廣曰在長安西宗正劉禮為將軍居霸上祝

茲侯軍棘門孟康曰在長安北秦時宮門也數月罷史記孝文本紀○孝文時匈奴數寇

邊晁錯上言曰胡人食肉飲酪衣皮毛非有城郭田宅之居美草

甘水則止草盡水竭則移往來轉徙時至時去今使胡人轉牧行

獵於塞下或當燕代或當上郡北地隴西以候備塞之卒卒少則

入陛下不救則邊民絕望救之少發則不足多發遠縣纔至則胡

又去聚而不罷為費甚大罷之則復入如此連年則中國不安矣

陛下憂邊境遣將吏發卒治塞甚大惠也然令遠方之卒守塞一

歲而更不知胡人之能不如選常居者家室田作且以備之以便

為之高城深塹具蘭石布渠答如淳曰蘭石城上雷石也復為一

城其內城間百五十步要害之處通川之道調立城邑毋下千家

為中周虎落鄭氏曰虎落者外蕃也若今時竹虎落也先為室屋

具田器乃募罪人及免徒復作令居之不足募以丁奴婢贖罪及

輸奴婢欲以拜爵者不足乃募民之欲往者皆賜高爵復其家予

冬夏衣廩食能自給而止其亡夫若妻者縣官買予之胡人入驅



而能止其所驅者以其半予之師古曰言胡人為寇驅掠漢人及畜產而他人能止之以得其所驅者令其本主縣官為贖師古曰官為備價贖之其民如是則邑里相救助赴胡不避死遠方無屯戍之事塞下之民父子相保無係虜之患矣上從其言漢書晁錯傳

武帝元朔三年秋城朔方城漢書武帝紀○漢拜郭昌為拔胡將軍及浞

野侯屯朔方以東備胡是歲元封六年也史記匈奴傳

宣帝五鳳四年匈奴單于稱臣以邊塞無寇減戍卒什二漢書宣帝紀

**後漢**世祖建武二十二年匈奴北徙幕南地空詔罷邊郡亭侯吏卒

○二十四年春正月匈奴薁鞬日逐王比遣使款五原塞求捍禦

北虜後漢書光武帝紀○二十六年冬復詔單于徙居西河美稷因使中

郎將段彬及副校尉王郁留西河擁護之為設官府從事掾史令

西河長史歲將騎二千弛刑五百人助中郎將衛護單于冬屯夏

罷自後以為常及悉復緣邊八郡南單于既居西河亦列置諸部

王助為捍戍使韓氏骨都侯屯北地右賢王屯朔方當于骨都侯

屯五原皆領部眾為郡縣偵羅耳目南匈奴傳

明帝永平六年北單于欲合市求和親顯宗許之○八年遣越騎司

馬鄭眾北使眾上言宜更置大將以防二虜交通由是始置度遼

營以中郎將吳棠行度遼將軍事副校尉來苗左校尉閻章右校

尉張國將黎陽虎牙營士屯五原曼栢又遣騎都尉秦彭將兵屯

美稷其年秋北虜果遣二千騎侯望朔方作馬革船欲度迎南部

畔者以漢有備乃引去後漢書南匈奴傳

章帝元和元年詔設官邸與北單于合市南單于出上郡遮畧生口

驅還入塞後漢書南匈奴傳

和帝永元七年正月馮柱將虎牙營屯五原後漢書南匈奴傳



順帝永和六年十一月以執金吾張喬行車騎將軍事將兵屯三輔

後漢書 順帝紀

**西魏** 大統六年夏茹茹度河至夏州太祖召諸軍屯沙苑以備之

文帝紀

**隋** 高祖開皇二年十月皇太子勇屯兵咸陽以備胡

隋書高祖本紀

**唐** 高祖武德初以豐州絕遠先屬突厥交相往來吏不能禁隱太子

建成議廢豐州虛其城郭權徙百姓寄居于靈州割并五原榆平

之地于是突厥遣處羅之子都設率所部萬餘家入處河南之地

以靈州為境

冊府元龜

○六年七月皇太子屯于北邊以備突厥○七

年閏七月秦王世民齊王元吉屯于邠州以備突厥

唐書高祖本紀

○武

德中帝會羣臣問所以備邊者將作大匠丁筠請五原靈武置舟

師于河扼其入中書侍郎溫彥博曰魏為長塹遏匈奴今可用帝

使桑顯和塹邊大道召江南舡工大發卒治戰艦

突厥傳

元宗厚接突厥歲許朔方軍西受降城為互市

唐書兵志

○互市監每監

監一人從六品下丞一人正八品下掌蕃國交易之事互市有衛

士五十人以察非常

百官志

○開元十五年十一月制以吐蕃為邊

患召關中兵萬人集朔方防秋

通鑑

德宗時陸贄奏諸牧有馬每州有糧肅宗得以為資先帝漸脩邊防

關中有朔方隴右等三帥以捍西戎聲勢壯盛士馬精強又召諸

道戍兵每歲乘秋備塞

陸宣公奏議

○貞元三年七月遣決勝軍使唐

良臣以其衆六百人自咸陽戍潘原堡神策副將蘇太平率其衆

五百人戍隴州八月以劉昌為京西行營節度使戍麟遊

冊府元龜

**後周** 太祖廣順四年延州向訓言請禁止州界民賣軍裝兵器於蕃

部從之

五代史周太祖本紀



**宋**真宗景德四年於保安軍置權場以緇帛羅綺易駝馬牛羊玉璫  
毯甘草以香藥瓷漆器薑桂等物易蜜蠟麝臍毛褐獐羚角硃砂  
柴胡菴蓉紅花翎毛非官市者聽與民交易入貢至京者縱其為

市 宋史食貨志

仁宗康定元年正月元昊寇延州詔陝西運使明鎬募強壯備邊四

月遣使籍陝西強壯軍備邊 宋史仁宗本紀 ○天聖中陝西權場二及元

昊反即詔絕其互市廢保安軍權場後又禁陝西並邊主兵官與

屬羌交易久之元昊請臣數遣使求復互市 食貨志 ○天聖中禁田

河西者虜乃得稍蠶食其地俯窺麟州司馬光 龐籍畫策宜因

州中舊兵益禁兵二千廂兵五百築二堡河西可使堡外三十里

虜不敢田則州西六十里無虜矣籍移麟州如其言 溫公文集 ○慶曆

二年詔發士三萬戍永興委總管司部分閱教歲以八月遣萬五

千人戍鎮戎軍十二月以萬五千人代至二月無警即還歲以為

常 宋史兵志 ○六年復置場于保安軍繼徙于順寧若既而蕃商卒無

至者 食貨志 ○至和二年麟府豐州先以閒田募置人給屋貸口糧

二石而德順軍靜邊寨壕外弓箭手尤為勁勇夏人利其地數來

爭朝廷為築堡戍守 文獻通考 ○嘉祐初禁陝西四路私與西人貿易

宋史食貨志 英宗治平四年詔延州募保捷五營以備更戍 宋史兵志 ○河東經畧司

言西界乞通和市乃復許之後二年令陝西邊民勿與通市又二

年遂申詔諸路禁絕既而河東轉運司請罷吳堡於寧星和市如

舊麟州復奏夏人之請乃令鬻銅錫以市馬而織縞與急湏之物

皆禁 食貨志

神宗熙寧三年保平軍節度推官王韶倡為緣邊市易之說丐假官



錢為本詔秦鳳路經畧司以川交子易物貨給之因命詔為本路帥司幹當兼領市易事○八年二月鳳翔永興軍並置市場司宋史

食貨志○范仲淹為陝西招討使以邊兵訓練不精又部署鈐轄等

權任相亞莫相統一于是首分鄜延路兵以為六將將合三千餘

人選路分都監及駐泊都監等六人各監教一將兵馬又選使臣

指揮使十二人分隸六將專掌教閱遇有寇警少則路分都監將

所部先出多則鈐轄署領兩將或三將以出更出迭入總領不貳

勞逸又均邊備寢脩寇不敢犯其後諸路皆用此制却掃編

哲宗元祐二年樞密院言今朝旨令熙河蘭會路都總管司遇本路

緩急闕人許于秦鳳路勾抽一將應副緣本路即日事宜慮向秋

闕人防守欲熙河蘭會路都總管司遇本路緩急闕人聽令勾抽

秦鳳路九將應副差使從京東差步軍五指揮赴永興軍商號州

權駐劄以備秦鳳路勾抽從之○元符二年閏九月遣秦鳳路戍

兵十指揮應副熙河新邊戍守宋史兵志

徽宗政和四年詔西羌久為邊患不叛今雖誓表已進羌戎之

性不保其往備戒不虞正在今日令陝西帥臣訓練兵伍除治軍

器繕修樓櫓收積芻糧所有弓箭手蕃兵常令優恤逃亡者可速

招補貧乏者亦令貸借將佐偏裨如或輒懦失職具名以聞或寇

至失事並行軍法宋史兵志

高宗建炎後吳玠兵屯鳳州大散關和尚原宋史兵志○紹興四年詔川

陝即永興軍威茂州置博易場食貨志○十二年五月乙未置陝西

權場高宗本紀

**金**熙宗皇統二年五月許宋人之請各置權場於兩界以通互市九

月命鳳翔府等處皆置續文獻通考



海陵正隆四年正月罷鳳翔等處所置權場金史食貨志

世宗大定四年復置鳳翔權場○十七年二月陝西沿邊權場止留

一處餘悉罷之罷保安綏德二權場金史食貨志二十一年以東勝與

陝西道路隔絕貿易不通尋令綏德州置一場仍許就館市易續文

獻通考

章宗承安二年復置場於保安○泰和八年八月以與宋和遂復置

場於秦鳳之地金史食貨志

宣宗興定五年十月分京畿戍卒萬二千河中民兵八千以元帥紇

石烈鶴壽將之屯潼關西金史宣宗本紀

**元**世祖中統元年五月以總帥汪良臣統陝西漢軍于沿河守隘元史

世祖本紀

**明**太祖洪武九年正月命中山侯湯和潁川侯傅友德等帥師往延

安防邊○三十年正月命長興侯耿炳文佩征西將軍印為總兵

官武定侯郭英為副往陝西選精銳步騎巡西北邊以備寇世法錄

英宗正統二年楊士奇楊榮楊溥上言今遣御史清軍有以陝西等

處之人往南方極邊補伍者有以江浙等處之人往北邊補伍者

其水土不相習北人苦于瘴癘南人苦于嚴寒多致死亡深為可

憫又西北二邊急于防守而所在勇壯之人乃發戍南方自今邊

卒清解者宜從南北所宜發戍庶幾人宜水土兵政有備詔廷臣

議行之時兵部侍郎鄭瑄掌部事曰此舊制不可紊稍有變易將

不勝其弊咎將誰歸卒不動歷朝時務策要○築東勝等城屯兵戍守明九

邊考○七年令陝西土軍土民餘丁若戶丁有在邊操備者免雜泛

差役續文獻通考

憲宗成化元年二月延綏都督張傑上安邊方畧謂綏延等境廣袤



千里甚宜耕牧但須增立營堡以時開閉且所轄東西二十五營堡每堡頓兵不過一二百人勢孤力弱可選諸營精兵九千分為六哨分屯府谷神木二縣龍州榆林二城高家安邊二堡無事則巡歷邊疆遇警則彼此應合又延安地臨極邊鄜州定邊俱在腹裡相去不止數程遇警猝難馳報其所屯防秋軍士二千餘人乞分布沿邊要害以備調用上從之○二年十二月叅政朱瑛奏近年毛里孩南侵延慶所在官軍既以堅壁清野為能隣近人馬又以據守信地為重各擁重兵傍觀坐視議推選武臣一員總制文臣一員充總督常鎮陝西節制三邊并腹裡軍務聽其操練調度兵部覆奏以陝西甘肅寧夏延綏俱有文武大臣再加以總督總制則三邊有事候其遙斷必誤事機今宜移文各官地方有警隣境即發兵應援毋誤軍機從之○三年三月王復言北虜最為邊

患今大同宣府有總兵叅守一十二員寧夏甘肅亦有八員而延

綏城堡寫遠止有總兵叅將三員調度豈能周徧請添設叅將二

員將先調鄜慶官軍存留四十員名慶陽衛官軍八百一十七員

名相叅土兵八百六十六名撥堡輪守詔曰可○六年陝西巡撫

馬文升奏榆林事宜揀將練兵豐財足食據險以遏其深入燎荒

以絕其孽牧四條上是其言世法錄○五月文升奏陝西三邊榆林

最為要害請勅該部每歲秋初遣主事一員督軍辦糧草事竣還

京事下戶部從之登壇必究○七年命侍郎葉盛行視河套時北虜入

河套議增兵設險或請大舉搜套驅虜出河外沿河築城堡抵東

勝徙民耕守其中盛往世法錄上言搜河套復東勝未可輕議惟增兵守

險可為遠圖上從之世法錄○十年巡撫余子俊議虜賊潛住河套

離邊不遠凡遇沿邊軍民耕作時月人畜在野計令分守東路右



參將領軍于神木堡遊擊將軍領軍于高家堡俱係要害去處住  
劉防禦東西二路分守參將并把總都指揮等官每堡三路擺塘  
哨探沿邊墩空數塘本堡東西相向數塘迤南腹裏東西相向數  
塘遇警放炮使耕作人畜運糧人等取便迴避及令各官整兵隄  
備遇有小寇隨即追殺若是大舉星馳通報發兵策應明九邊考  
孝宗弘治初總督都御史王越疏奏綏德在秦時為上郡歷漢隋唐  
皆為邊鎮國初洪武二年定陝西設綏德衛屯兵數萬守之撥綏  
德衛千戶劉寵屯治榆林正統中命都督王貞鎮守延綏始議築  
榆林城及沿邊十八寨遂移鎮焉成化七年置榆林衛八年都御  
史余子俊開廣榆林城垣增置三十六營堡以今日陝西邊備論  
之國初以綏德為邊衛東自葭州黃河西至定邊營七百餘里岡  
阜相連有險可據猶易為守自移鎮榆林綏德官軍移徙不常在

綏德者不及什一虜賊大舉或由榆林東雙山堡等處入寇綏德  
或由榆林西南定邊營花馬池等處入寇固原榆林之兵其在東  
也則以無險而不能守其在西南也則以路遠而不能援其在綏  
德舊鎮也則以兵寡而不能禦為今之計宜量撤兵卒之半復還  
綏德使守險拒敵防其深入其榆林及新設城堡各計其屯田歲  
入之數留兵屯守而移置其多餘之屯於定邊營要害之地委謀  
勇將官統之如此則虜不敢深入而內無土崩之患矣明奏疏

武宗正德元年正月命巡撫楊一清總制陝西延綏等處邊務兼督  
馬政一清言寧夏花馬池與武營直抵高橋三百餘里為虜入邊  
門戶近因警報議調延綏遊兵土兵至此分布防禦而無一人至  
者蓋事關各鎮不相統攝故也宜命大臣為總制居中調度如虜  
衆出套亟行經畧花馬池一帶邊務庶有備無患全陝可安兵部



集議遂以一清薦乃有是命○先是孝宗弘治末朝廷清明內外大臣協心體國議復河套會孝宗崩劉瑾專政總制楊一清上經畧三疏一議守守虜所必入一議戰戰虜所必敗一議攻攻虜所必救已一清得罪去無敢言及河套者世法錄

世宗嘉靖二十六年十一月曾銑會同撫按官疏陳邊務十八事曰恢復河套曰脩築邊垣曰選擇將材曰選練將士曰買補馬騾曰進兵機宜曰轉運糧餉曰申明賞罰曰兼備舟車曰多備軍器曰招降用間曰審度時勢曰防守河套曰營田儲餉曰明職守曰息訛言曰寬文法曰處孳畜奏下兵部覆言銑經畧甚詳但事體重大請下其章於廷臣各疏所見然後集議上曰虜據河套為國家患朕軫念宵旰有年矣念無任事之臣今曾銑前後所上方畧卿等既看詳即會衆協忠定策以聞已而銑復上營陣圖八曰立營

總圖曰遇虜駐戰圖曰選鋒車戰圖曰騎兵逐陣圖曰步兵博戰

圖曰行營進攻圖曰變營長驅圖曰獲功收兵圖上覽而嘉之令

廷臣一併議奏世法錄○二十八年題准延綏遊兵照原議應援宣

大如宣大稍寧延綏緊急將老營堡遊兵一枝聽候延綏調遣明會

典○三十年七月延綏鎮巡等官張愚等言本鎮自開國以來未

經開市法宜慎始且東西相距千五百里無邊牆為限雖定邊稍

有邊牆而地多平漠惟花馬池界在延寧二鎮之中有邊牆三百

餘里可以為據宜合二鎮同此立市限以日期先後互易總督大

臣用防秋例駐此以便調度兩鎮撫鎮各帶兵馬分布防禦仍乞

比照大同事例給發帑銀充用從之發銀四萬令總督會同鎮巡

官酌議停當如大同例行部光先奏延寧二鎮互市應行事宜六

條一議處撫賞一議定市期一處置市貨一議給馬價一分定市



地一優贍通丁世法錄○嘉靖中俺荅開市凡十一處在延綏者一

曰紅山寺堡續文獻通考○榆林地險而防嚴將士戰不貫胃虜呼為

駱駝城舊以陝西左前後右護衛延安綏德慶陽三衛并河南南

陽衛穎上千戶所直隸潼關寧山二衛官軍輪班哨守延安府府

谷安定安塞保安四縣并綏德衛屯種柳樹會拜堂兒麻藥河俱

在近邊地方止是人民屯軍土兵人等居住若定委千百戶所管

屯官一員會同各縣編成行伍給領軍器常川操練就于本縣防

守可代邊軍河套地方千里虜數萬入居其中趨逐水草四散畜

牧欲大舉南寇則令人傳示諸部落約日聚眾而進既聚眾至二

三萬夜宿火光連亘數十里我之墩軍夜不收瞭望先知我兵可

設備矣虜眾臨墻止宿必就有水泉處安營飲馬今花馬池墻外

有鍋底湖柳門并興武營外有蝦蟆湖等泉定邊營外有東柳門

等并餘地無井泉又多大沙凹凸或產蒿深沒馬腹賊數百騎或

可委曲尋路而行多則不能故設備之處有限明九邊考

穆宗隆慶元年題准延安衛舊有遊擊統領官軍三千駐劄本處防

秋則赴大邊鎮靖堡後改延安遊擊為鎮靖叅將遂將官軍二千

移駐鎮靖一千移駐鄜州延安城池空虛令鎮靖營將原調延安

軍五百七十名發回城操而以新募兵發補鎮靖營缺數續文獻通考

神宗萬曆十三年題准延鎮備禦陝西西安并潼關各衛所班軍暫

免遠戍徵銀解邊防守續文獻通考○邊市距鎮城之北十里許為紅

山市又東為神木市又東為黃甫川市皆屬國互市處也正月望

後擇日開市間一日一市鎮人習蒙古語者持貨往市有土城不

屋陶穴以居或施帳焉其貨則湖茶蘇布艸段鹽烟不以米不以

軍器蒙古之至者則羊絨駝毛狐皮羔皮牛羊兔不以馬鎮城及



營堡俱有市而沿邊村落亦間有之如黃甫川之呆黃坪清水營之尖堡子神木營之紅寺兒清水坪高家堡之豆峪萬戶峪建安雙山之大會坪通秦砦金河寺柳樹會西寺子波羅迤西之土門子白洛城卧牛城威武清平之石人坪麻葉河鎮靖之筆架城靖邊寧塞迤西之鐵角城順寧園林驛吳旗營把都求濟新安邊迤西之鎖骨朶城張寡婦寺李家寺沙家掌五箇掌者是也其稅少止數錢多不過二兩而已各堡之守備把總司之于春秋兩季解布政司充餉延綏鎮志○國初虜遁河外居漠北延綏無事正統以後浸失其險虜始渡河犯邊鎮守都督王貞始築榆林城創沿邊一帶營堡墩臺累增至二十四所歲調延安綏德慶陽三衛官軍分戍而河南陝西客兵助之列營積糧以遏寇路景泰初虜犯延慶不敢深入天順初阿羅出掠我邊人以爲嚮導因知河套所在不

時出沒遂爲邊境剝膚之害

世法錄

○延綏初築東勝等城戍守河

外正統間失東勝退守黃河後失河套又棄河守墻鎮城舊在綏德捐米脂魚河等地于外幾三百里成化中徙鎮榆林東起黃甫川西至定邊營千二百餘里聯墩勾堡橫截河套之口遂稱雄鎮但鎮城不產五穀芻糧皆仰給腹裏明會典○陝西防邊之法考唐

三城守之於河外上策也蓋守之于河外則險在我而易爲力守之于河南則險在虜而難爲功也脩夾道之墻時出精兵以搜套中策也其下策來則浪戰去則坐守而已苑洛集○榆林舊治在綏

德成化時余肅敏子俊廣開城垣增置三十六營堡其邊墻東起黃甫川西至定邊營長千二百餘里橫絕河套之口侈其功者曰鎖包米脂魚河三百里膏腴地東連牛心堡可便應援西截河套衝可便耕牧千三百里樹藝圍獵樵採之地吾得擅而有焉據險



衛內誠雄鎮也引為罪者曰榆林東有雙山堡虜由此而寇綏德我兵之在東者以無險而不能守也榆林西南有定邊花馬池虜由此而寇固原我兵之在西南者以路遠而不能援也且鎮既移則綏德之兵寡其不能禦虜必也憂其危者曰軍所恃者食也自虜據套而耕牧絕耕牧絕而轉輸艱轉輸艱而士伍耗榆林之軍不患不勇而患恒飢也惟陝州有河可通綏德若計沿河郡縣改徵本色悉以輸之庶少蘇耳且夫亂峯墩野猪峽是直衝魚河之徑虜若駐兵魚河則斷榆林綏德為兩矣又自定邊營西抵寧夏東黃河岸橫城堡三百里中多平漫沙漠虜賊大舉多由此入當慎之矣有王者起復河套而守東勝彼榆林之或有或無正不足

深論也 朱思本輿地圖

學習進士文魁校



